

Mak

Jisas Kraiss Minim Tep ak Mak ñu kil tikak

Jon Bi Ñig Pak Ñeb ak God minim ag ñoligip
(*Mat 3:1-12; Luk 3:1-18; Jon 1:19-28*)

1 ¹Jisas Kraiss, God Ñi ne minim tep ak agnig gebin. ²God birarik nep Ñi ne Jisas Kraiss nop minim agak rek, bi God minim agep Aisaia, minim nibak God Minim ñu kil tikil agak,

“Niñan! Bi minim yad dad ameb ak, ned ag yoken amil, kanib nep ak lig gi tep ginigab.

³Bi nibak, karip lim bin bi koñai ma midebal, miñ mab kab nep mideb nab siñak am midil, sik agil agnigab, “Bi Kib ak azeb! Kanib mak kilan kiyan gi midonimiñ okok, dim gol pilis gi midonimiñ okok, piñil pag tep ginimib, agnigab,” agak.

⁴God minim agep bi nibak ned nib agak rek nep me, Jon bi ñig pak ñeb ak amil, karip lim bin bi koñai ma mideligipal, miñ mab kab nep midoligip nab siñak midek niñlig gi, bin bi okok apel, kirop minim ag ñil agoligip, “Tap si tap timel gipim okok, tari ginig nig gipin, agil, kirig gem, yad nibep ñig pak ñen, God tap si tap timel gipim okok niñil kirig ginigab,” agoligip. ⁵Ne nib agek niñlig gi, bin bi karip lim Judia yokop nib okok midelak okok abe, Jerusalem bin bi midelak okok abe, kiri magilsek minim nop ak niñniñ amnilak. Amil, tap si tap timel göligipal okok, ag misen lele, Jon kirop ñig Jodan nab siñak ñig pak ñak.

⁶Pen Jon walij ne ak, kaj kamel kas dil gilak walij alap yimil, kaj kau wak sib nag nab siñak pog loligip. Tap niñeb ne ak, joñ golbid ak abe, bom ñig ak abe ñiboligip. ⁷Ne bin bi okok kirop agoligip, “Bi yip sain azeb ak, ne yad rek mer; ne bi kib yib, yad bi sikol. Yad nop niñen nabiñ ginigab. Yad amil ulep siñak kogim yimil tob tirip ne ak nag wisibnim

rek ma lip. ⁸Yad nibep ñig nep pak ñebin ak pen ne apil, nibep Kaun Siñ ak nep pak ñinigab,” agak.

Jon Jisas nop ñig pak ñak
(*Mat 3:13-17; Luk 3:21-22*)

⁹Pen ñin alap, Jisas Nasaret taun, karip lim Galili Propins midoligip ak kirig gil, Jon midek siñak apek, Jon Jisas nop ñig Jodan nab siñak ñig pak ñak. ¹⁰Nop ñig pak ñek, Jisas ñig gol siñak alarj amil niñak, seb kab ar alarj pag yikek, God Kaun ak yakir tibaglem rek, Jisas nop ug gi owak. ¹¹Ñig gil ug gi apek niñlig gi, minim alap seb kab ar alarj siñak nib apil agak, “Nak Ñi midmagil yad yib. Nep niñen, yip tep yib gip,” agak.

Seten apil Jisas nop neb neb gak
(*Mat 4:1-11; Luk 4:1-13*)

¹²Pen won nibak nep, God Kaun ak Jisas nop ag yokek, miñ mab kab nep midoligip nab okok amil, ¹³ñin aknib ñin juil omal (40) siñak midek. Nib okok midek niñlig gi, Seten, “Jisas nop gen, minim yip ak kisen gil, timel garj,” agil, apil agoligip. Karip lim midoligip miñan nibak ke kain tap okok nep midoligip. Pen ejol okok apil, Jisas nop kod mideligipal.

Jisas God minim tep ak ag ñi midek

¹⁴Pen kisen gapman bi kib Herod Jon nop miñ lak niñil Jisas ne karip lim Galili Propins amil, God minim tep ak bin bi okok kirop ag ñilig gi agak, ¹⁵“God bin bi dil kod midenigab ñin per kod mideligipim ak, miñi owip! Tap si tap timel gipim ak, tari ginig nig gipin agil kirig ginimib, God minim tep ak niñid ageb, agil, niñ dinimib,” agak.

Jisas bi ne omal omal dak
(*Mat 4:18-22*)

¹⁶Jisas Ñig Cöb Galili gol siñak padiklig gi niñak, bi kibsal dep mamil mal, kibsal dir, agil, uben alap di ñig nab eyarj yokil miderek. Bi mamil nib mal yib kiri mal ak, Saimon eip Edru eip. ¹⁷Jisas kirop mal niñil agak, “Aper, yad eip ajil, yad nirep mal ag ñi tep gen, bin bi dep bi omal midenigair,” agak. ¹⁸Jisas agek, niñid ageb agil, dai uben okok kirig gil, Jisas eip amnirek.

¹⁹Pen Jisas yokop sikol won alap amil niñak, Sebedi ñi ne Jems eip, Jon eip ñig magöb miñan ak midlig gi, uben pig gi rikak tam ak, ñag dör gilig gi miderek. ²⁰Jisas kirop mal niñil agak, “Ñiri mal owir e!” agak. Jisas nib agek, kiri mamil mal niñil, nap nop wög gi ñeb bi ognap eip kirop ñig magöb ar siñak kirig gil, Jisas eip amnirek.

Kijeki bi alap nop aban ñagak ak, Jisas ag sön yokak
(Luk 4:31-37)

²¹Pen kiri taun sikol Kapaneam amil, Juda God nop sobok gep ñin ak, Jisas Juda mogim gep karip ñilik migan eyan amil, God Minim ak ag ñek, ²²bin bi okok niñil, pak ju dil aglak, “God lo minim ag ñeb bi okok agebal rek ma ageb; ne bi kib yib niñ tep gil agebal rek ageb,” aglak. ²³Pen magil nibak, bi kijeki aban ñagak bi alap, mogim gep karip ñilik migan nibak apjakil bleble gil agak, ²⁴“Jisas bi Nasaret nib! Nak cinop tari ginig opan? Cinop kijeki okok ñag pak linig opan aka? Yad nep nipin, nak God Ñi Siñ ne ak,” agak.

²⁵Agek, Jisas pen kijeki bi nibak aban ñagak ak nop minim kilis agil agak, “Minim ma agan! Bi ak nop kirig gil, mis amnon!” agak. ²⁶Jisas nib agek, kijeki nibak bi ak nop di jep jep dil, sik gaul gil, sön amnak. ²⁷Jisas nig gek, bin bi midelak okok wal yib agil, minim ag niñ ag niñ gil aglak, “Ak tari? Bi aul minim kisen nib alap dapil ag ñeb. Ne bi kilis sek. Kijeki kiyob ñilik okok minim ne dil ageb rek gebal,” aglak. ²⁸Bin bi okok nib aqliğ gi, Jisas kijeki kiyob ñilik ag sön yokak minim nibak, karip lim Galili okok magilsek ag ñel amnak.

Jisas gek, Saimon nibor nop komiñ lak
(Mat 8:14-15; Luk 4:38-39)

²⁹Pen Jisas, Jems, Jon, Saimon, Edru, kiri Juda mogim gep karip ak kirig gil, sön amil, Saimon eip nimam Edru eip karip kiri ak amnilak. ³⁰Karip amjakel, Jisas nop aglak, “Saimon nibor ne mib goñ ak mab rek yinek, kin mideb,” aglak. ³¹Agel, Jisas amil ñinmagil kid ne ak dil di warik ñek niñlig gi, wak ne mab rek yinek ak komiñ lak niñil dai tap magil kirop ñak.

Jisas gek, bin bi koñai nep komiñ lak
(Mat 8:16-17; Luk 4:40-41)

³²Pen pib pañid amnak magil ak, bin bi tap gak okok abe, bin bi kijeki aban ñagak okok abe, Jisas gek komiñ lan, agil, Jisas midek siñak dolak. ³³Taun sikol Kapaneam bin bi okok magilsek apil, karip kijoñ wagin sön kid eyan ar niñ midel niñlig gi, ³⁴bin bi koñai nep tap ke ke gak okok, Jisas gek, komiñ lak. Kijeki kiyob ñilik aban ñagak okok koñai nep ag mis yokak. Pen kijeki kiyob ñilik nib okok, Jisas nop bi an, niñ tep gilak rek, Jisas kirop, “Minim ma gim,” agil, ag mis yokak.

Jisas migan alap ke amil, Nap nop sobok gilig gi midek
(Luk 4:42-44)

³⁵Minek, Jisas kislim sek yib warikil, karip kinak ak kirig gil, taun nibak abe kirig gil, am migan alap ke amil, Nap nop sobok gilig gi midek.

³⁶Pen bi ne Saimon, bi ne ognap eip, Jisas akal, agil, nop piyo niɲnig amnilak. ³⁷Jisas nop piyo niɲ dam niɲil aglak, “Bin bi magilsek nep akal, agil, piyoebal,” aglak. ³⁸Nib agelak, Jisas agak, “Cin karip tirig tiron ognap sek ulep siɲaul amnin. Yad opin ak, bin bi karip lim migan tigoɲ tigoɲ kirop minim ag ñinim, agil, opin,” agak. ³⁹Nib agil, karip lim Galili nab okok gi taglig gi, am Juda mogim gep karip migan okok amil, God Minim ag ñilig gi, kijeki kiyob ñilik bin bi kirop aban ñagak okok ag sɔɲ yokak.

Jisas, soi sapeb lak bi alap gek, milep gak

(Mat 8:1-4; Luk 5:12-16)

⁴⁰Soi sapeb lak bi alap, Jisas midek siɲak apil, kogim yimil, agak, “Nak soi yip ak komiɲ lan, agenigan ak, komiɲ linimiɲ,” agak. ⁴¹Nib agek, Jisas nop yimig niɲil, ñinmagil parsek lil, bi nibak nop di niɲil, agak, “Yau, ginigain. Komiɲ lan,” agak. ⁴²Nop di niɲek, dai soi sapeb lak ak ulek lil komiɲ lak. ⁴³⁻⁴⁴Pen Jisas bi nibak nop minim kilis agil agak, “Kanib nab okok bin bi ognap kirop niɲil, Jisas yip gek komiɲ lip, agil, ma agnimin. Yipid gil nep amil, bi God nop tap sobok gep ak nop miɲ goɲ nak ak yomil, agnimin, ‘Soi sapeb yad ak komiɲ lip,’ agnimin. Nib agil, Mosis ned agak rek, tap ognap dam bi God nop tap sobok gep bi ak ñenimin, ne pak God nop sobok gi ñek me, bin bi okok, bi ak miɲni komiɲ lip, agil, niɲnigal,” agak. Jisas minim nibak nep agil, bi ak ag yokek, amnak. ⁴⁵Jisas nib agak ak pen bi nibak ne amil, bin bi okok abramek ag ñek amnak. Niɲ gek, Jisas taun okok misen ajoniɲ rek ma lek, ne amil, bin bi koɲai ma midelak nab okok nep midek niɲlig gi, bin bi karip lim tigoɲ tigoɲ magilsek nop niɲnig apeligipal.

Jisas gek, ñin tob kalau gak bi alap komiɲ lak

(Mat 9:1-8; Luk 5:17-26)

2 ¹⁻²Ñin omal nep padikek niɲlig gi, Jisas kauyaɲ taun sikol Kapaneam apek, Jisas ap mideb karip ne ak, agel, bin bi koɲai nep apil gel gel, karip migan minim ag ñek migan ak tibik gil, kijon wagin sɔɲ ar siɲ eyaɲ ak rek nep tibik gi yib gak. Pen Jisas kirop God Minim ag ñi midek. ³Jisas kirop ag ñi midek niɲlig gi, bi aknib tiɲaup par alaɲ ak bi ognap eip, bi ñinmagil tob kalau gak alap yir ar lil, dapil Jisas midek siɲak dolak. ⁴Apil niɲlak, bin bi tibik dil midelak niɲil bi ñinmagil tob kalau gak ak nop dam karip ar alaɲ amil, karip nab siɲak tig migan juil, yir ar kinek ak nag lil bi nibak sek yokel, am Jisas midek eyaɲ yowak. ⁵Pen kiri Jisas gek komiɲ linigab, agil, gos niɲ dilak ak niɲil, Jisas agak, “Ñi yad. Tap si tap timel gipan okok niɲil, kirig gebin,” agak.

⁶Nib agek, Juda lo minim ag ñeb bi ognap bisig midelak okok, gos kiri okok nep niɲil aglak, ⁷“Bi aul tari ginig, God nop ag julig gi, minim

tom ageb? Bin bi okok tap si tap timel gel, bi alap acir kirop ak lig gi yoknimiņ rek ma lip; God nokim nep me nig ginigab,” aglak. ⁸Pen gos niņlak nibak, dai Jisas ke niņil agak, “Ni bi tari ginig gos nibak rek niņebim. ⁹Bi ñinmagil tob kalau gip ak nop tari agen, nibep tep ginigab? Tap si tap timel gipan ak niņil kirig gebin, agen, nibep tep ginigab; aka, warikil mij bad nak piyak winig dad amnoņ, agen, nibep tep ginigab? ¹⁰Pen yad gen, nipi niņnigabim, Bi Ñi ne lim dai ar wagin aul onek ak, gos yad ke niņil ma onek. God agek onek ak me, tap si tap timel gipal ak niņil kirig ginigain, agnigain ak, kirig ginigain,” agak. ¹¹Nib agil, bi ñinmagil tob kalau gak ak nop agak, “Yad nep agebin, warikil, mij nak bad piyak winig dil, karip amnoņ,” agak. ¹²Jisas nib agek, bin bi niņ midel niņlig gi, bi nibak warikil, mij bad ne ak winig dil paņdak. Nig gek niņlig gi, bin bi okok magilsek wal yib agil, God yib ne ak agel ar amek niņlig gi, aglak, “Ned tap nibak rek alap gel, cin ma niņoligipin,” aglak.

Jisas Lipai nop sik agak
(*Mat 9:9-13; Luk 5:27-32*)

¹³Jisas kauyaņ amil, Ñig Cöb Galili gol siņak tagek niņlig gi, bin bi koņai nep niņil, midek siņak ap mogim gelak niņlig gi, Jisas kirop God Minim ag ñak. ¹⁴Jisas minim ag ñi dai juil, kanib nab siņak amlig gi niņak, Alpias ñi ne Lipai, bi takis dep bi alap, wög goliņip karip ñilik miņan ak bisig midek. Jisas nop niņil agak, “Apek, yad eip amnir,” agek, warikil Jisas eip amnak.

¹⁵Jisas pen, bi ne okok eip Lipai karip ak amil, bisigil tap ñibel niņlig gi, bi takis dep okok abe, bi tap si tap timel gilak okok abe, Jisas eip aņelak rek, karip nibak amil jim ñil tap ñibelak. ¹⁶Bi lo minim ag ñeb bi Perisi ognap, Jisas ne bi takis dep okok eip, bi tap si tap timel göliņipal okok eip midil tap ñibek ak niņil, bi ne okok kirop aglak, “Jisas tari ginig bi takis debal okok eip, bi tap si tap timel gebal okok eip bisig midil tap ñibeb?” aglak.

¹⁷Agelak, Jisas minim nibak niņil agak, “Bin bi komiņ midebal okok, soi ñon gep bi niņnig ma ambal; bin bi tap gip okok nep soi ñon gep bi niņnig ambal. Nib ak rek, bin bi, gi tep gipin, ag gos niņal okok, kirop diņig ma opin; bin bi, tap si tap timel gipin, ag gos niņal okok, kirop diņig opin,” agak.

Jisas minim sid tikil agak, minim yad ak minim kisen nib, agak
(*Mat 9:14-17; Luk 5:33-39*)

¹⁸Jon bi ñig pak ñeb bi ne okok abe, Perisi kai bi kiri okok abe, ñin ognap God nop sobok gilig gi nep midojin, agil, tap ma ñibeligipal. Ñin alap kiri nig gelak ak niņil bin bi ognap apil Jisas nop aglak, “Jon bi ne okok abe, Perisi kai bi kiri okok abe, ñin nokim nokim tap bil gipal. Pen

bi nak okok, tari ginig nig ma gipal?” aglak. ¹⁹Agelak, Jisas minim sid tikil agak, “Bi bin dinig ginigab bi alap, nimid nimam ne okok eip midil, tep gek niŋlig gi mideniŋal ak me, tap magil ma kirig ginigal. ²⁰Pen kisen, bin bi ognap apil, bi kiri nibak nop dad ameniŋal ak, mapin gek, ŋin nibak tap ma ŋiŋniŋal. ²¹Pen walij kisen nib bad alap dil, walij ajil gil pig gi rik ginigab tam ak ŋag del, walij kisen ak kilis midlig gi, walij ajil ginigab ak pig gi rikil, walij nibak tapin nep pig gi rik dek amniŋab.

²²“Ŋig wain ak, ak rek nep. Ŋig wain komiŋ ak dil, kaj meme wak ned nib miŋan ak ma soŋ gi lipal. Pen tari: soŋ gi lil simjen ŋel, kaj meme wak ak biŋ agil, pig gi rikil soŋ gi am sakniŋab. Nib ak me, ŋig wain komiŋ ak, kaj meme wak komiŋ miŋan ak nep soŋ gi lep,” agak.

Bi Ŋi ne God nop sobok gep ŋin ak Bi Kib mideb

²³Kisen Juda God nop sobok gep ŋin kiri alap, Jisas bi ne okok eip wid wög nab siŋak padiklig gi, bi ne okok wid magil ognap tiklig gi amelak. ²⁴Ŋig gel, Perisi bi okok niŋil, Jisas nop aglak, “Miŋi God nop sobok gep ŋin cin wög ma gep ak, tari ginig bi nak okok nig gil wög gil lo cin tib juebal?” aglak. ²⁵Agelak, Jisas agak, “Based Depid birarik nep yuan lek gak kesim ŋu kil tiklak ak, nibi ma nipim ar? ²⁶Birarik nep bi nak Abiata God nop tap sobok gep bi kib yiŋ midoligip ŋin ak, Depid bi ne okok eip kirop yuan lek, God sobok gep karip ak amil, bred bin bi yokop okok ma ŋibeligiŋal, bi God nop tap sobok gep bi okok nep ŋibeligiŋal ak dil, bi ne okok kirop ŋek, ŋiŋlak.

²⁷“God ne ŋin yokop midep minim ak ned agil, kisen bin bi ma gi lak; bin bi ned gi lil, kiri ake lil mid tep genimel, agil, ŋin alap yokop midenimel, agak. ²⁸Nib ak, cin nipin, Bi Ŋi ne God nop sobok gep ŋin ak abe Bi Kib mideb,” agak.

Jisas bi ŋinmagil kalau gak alap, God nop sobok gep ŋin ak gek, komiŋ lak

(Mat 12:9-14; Luk 6:6-11)

3 ¹Ŋin alap pen, Jisas kauyaŋ Juda mogim gep karip ak amil niŋak, bi ŋinmagil kalau gak alap karip ŋilik miŋan nibak ap midek. ²Bi Perisi midelak okok ognap, Jisas tari rek gek, nop dam minim kib agin, agil, bi nibak God nop sobok gep ŋin aul gek komiŋ liniŋab aka mer agil, kapkap niŋ i sek li midelak.

³Jisas pen bi ŋinmagil kalau gak ak nop agak, “Warikil, siŋaul owan,” agak. ⁴Agek, ne midek siŋak alaŋ apek, Jisas bin bi nib okok kirop agak, “God nop sobok gep ŋin ak tari gep? Tep gep aka timel gep? Bin bi okok kirop yimiŋ niŋil gon, komiŋ amnimel, aka gos timel niŋil kirig gon, kimnimel?” agak. Agek, kiri nop pen minim alap ma aglak. ⁵Jisas minim ma diŋin ag gos niŋlak bi nib okok, Jisas kirop niŋek, miŋlik yowak. Kiri bi

ñinmagil kilau gak nibak nop midmagil ma lilak ak niñil, Jisas kirop niñ padiklig gi silikak. Nig gil, bi ñinmagil kalau gak ak nop agak, “Ñinmagil nak parsek lan!” agak. Agek, ñinmagil parsek lek niñlig gi, komiñ lak. ⁶Nig gak niñil, bi Perisi Juda mogim gep karip ak kirig gil, Herod bi ne okok midelak siñak amil, minim ag niñ ag niñ gil, “Jisas nop titi gil dam ñag pak lin?” aglak.

Bin bi koñai nep Jisas kisen gilak

⁷⁻⁸Jisas pen bi ne okok eip amil, Ñig Cöb Galili gol siñak am midelak. Pen bin bi Galili nib koñai nep nop kisen gil olah. Ne tap tari tari goligip ar ak magilsek agel okok amek niñlig gi, Judia bin bi ognap, Jerusalem bin bi ognap, karip lim Idumia bin bi ognap, ñig Jodan pis kid adaj bin bi ognap, taun kib omal Taia Saidon karip lim ulep siñak nib bin bi ognap, bin bi koñai yib Jisas nop niñniñg olah. ⁹⁻¹⁰Jisas bin bi koñai nep gek, komiñ lak ak me, nop di niñon komiñ linimiñ, agil, bin bi koñai yib nep apil, nop cirok cirok ñilig gi apel, yip piñil kis ginigal, agil, bi ne okok kirop agek, ñig magöb alap di lilak. ¹¹Pen bin bi kijeki kiyob ñilik tap tari abañ ñagak okok, Jisas nop niñil, tob wagin ne siñak lim eyañ yap pakil, minim kib agil, “Nak God Ñi ne!” agöligipal. ¹²Jisas pen kijeki kiyob ñilik okok kirop minim kilis agil agöligip, “Yad Bi an midebin ak misen ma agnimib mer,” agöligip.

Jisas bi ne akniñ umigan alañ dak

(Mat 10:14; Luk 6:12-16)

¹³Pen Jisas karip lim dim alap amil, bi ne diniñg gak okok agek apelak. ¹⁴Bi akniñ umigan alañ ag lil agak, “Nibi yad eip ajil, bi minim yad dad ameb okok midil, nibep ag yoken, amil bin bi okok kirop God Minim tep ak ag ñinigabim. ¹⁵Yad nibep agebin ak me, kijeki kiyob ñilik tap okok ak rek nep ag yokniñgabim,” agak. ¹⁶Jisas bi ne dak nib okok yib kiri me, alap Saimon, kisen Jisas yib ne alap Pita agak. ¹⁷Alap Jems, nimam alap Jon, nap kiri mal yib ak Sebedi. Jisas kirop mal Boanerges agak. Yib nibak wagin ak “Timik Bi”. ¹⁸Bi ne alap Edru; alap Pilip; alap Batolomyu; alap Matyu; alap Tomas; alap Jems, Alpias ñi ne; alap Padias; alap Saimon, nop Saimon Selot agöligipal. ¹⁹Pen alap Judas Iskariot. Ne me kisen Jisas nop mimiñg gak.

Jisas nop kijeki abañ ñagip, aglak

²⁰Pen Jisas karip alap amek, kauyañ bin bi koñai nep ap mogim gi midelak niñil, bi ne okok eip tap niñniñmel rek ma lak. ²¹Nig gek, bin bi ognap Jisas saköl ñagip agel niñlig gi, nonim nimam sikop nop poñ diniñg olah.

²²Pen lo minim ag ñeb bi Jerusalem nib olah okok aglak, “Kijeki kiyob ñilik tap okok nap kiri Bielsebul Jisas nop abañ ñagip rek, kiyob ñilik

tap okok ag yokeb,” aglak. Minim esek nibak agelak, ²³Jisas ne niñil, bin bi okok kirop agek apelak, minim ar nibak minim sid tikil agak, “Seten ne titi gil Seten nop ag yoknigab? ²⁴Bin bi karip lim kiñ nokim alap nep kod midenigab bin bi okok, kiri bin bi kiri ke pen pen genigal ak, tigon nibak asik ke ke lil ap yap paknigab. ²⁵Pen amilgon apilgon okok ak rek nep, kiri bin bi kiri ke pen pen genigal ak, kiñiñ nibak asik ke ke lil ap yap paknigab. ²⁶Nib ak rek, Seten ne ke kijeki kiyob ñilik tap ne okok ag yokenigab ak, asik ke ke lil pis nep yap paknigab.

²⁷“Bi kal yib alap karip ne siñak midek niñlig gi, bi alap apil, tap nop okok ma dad amnigab; ned bi kal nibak nop nag ñon gi lil me, amil tap karip ne okok mideb ak dad amnigab.

²⁸“Yad nibep niñid yib agebin, bin bi okok tap si tap timel tari tari ginigal ak, God niñil kirig ginigab. God nop ag juenigal ak, ne niñil kirig ginigab. ²⁹Pen Kaun Siñ ak nop ag juenigal ak, God niñil ma kirig ginigab. Tap si tap timel ginigab nibak per nep midenigab,” agak. ³⁰Jisas nop, “Kijeki kiyob ñilik tap okok nop abañ ñagip,” agelak ak me, nib agak.

Jisas nonim nimam sikop okok

³¹Pen Jisas nonim nimam sikop apil, sön eyañ midil, bi alap nop, “Nak amil Jisas nop agek owan,” aglak. ³²Nib ak, bin bi karip ñilik miñan eyañ Jisas nop piñil kis kis gi bisig gi midelak okok nop aglak, “Nanim nanai namam sikop okok sön eyañ am midil, ‘Nak owan e,’ agebal,” aglak. ³³Nib agelak, Jisas agak, “Ami yad, mam yad bi an?” agak. ³⁴Nib agil, Jisas bin bi midelak okok niñ padiklig gi agak, “Nibi me ami yad, mam yad midebim. ³⁵Bin bi God ageb rek gipal okok me, mam yad, ai yad, ami yad midebal,” agak.

Jisas, bi tap yiñ yimib ak, minim sid tikil agak

(Mat 13:1-9; Luk 8:4-8)

4 ¹Jisas Ñig Cöb Galili gol siñak amil, bin bi okok kirop kauyañ minim ag ñi midek niñlig gi, bin bi koñai yib nep ap mogim gilak. Niñ gelak, Jisas niñ magöb alap ar ak bisig gil, amil niñ nab ulep siñak midlig gi, bin bi niñ gol okok warik midelak okok kirop minim ag ñak.

²Minim nib okok minim sid tikil ar ke ke koñai nep ag ñak.

³Minim ar alap minim sid tikil agak, “Minim agniñ gebin aul niñim! Bi alap wög dai ne ak wid yiñ tanañ, agil, di yokek amek niñlig gi, ⁴yiñ ognap kanib ameb ar siñak yapek, yakir okok apil niñnigal. ⁵Yiñ ognap kab ar lim sikol sikol lenigab siñak yapil tannigab ak pen ⁶kidil yipil ma amnigab rek, pib niñil, milep ginigab. ⁷Yiñ ognap kilikasik midenigab nab siñak yapil, tannigab ak pen kilikasik okok sau gi pak ñibek, magil ma pilnigab. ⁸Pen yiñ ognap lim tep ar ak yapil, tan tep gil, magil pil tep ginigab. Ognap magil ñin

juil nokim alap adik gi dam wajrem alarj (30) rek pilnigab, ognap magil ñin juil omal nokim (60) rek pilnigab, ognap ñin juil aknib mamid alarj (100) rek pilnigab,” agak. ⁹Jisas minim nibak ag dai julig gi agak, “Nibi bin bi gos timid midonimij okok, minim agebin aul timid li niñ tep ginimib,” agak.

Jisas ti ginig gi minim sid tikil agoligip

(Mat 13:10-17; Luk 8:9-10)

¹⁰Jisas minim agek niñlig gi, bin bi niñ midelak nib okok ke ke amnilak niñlig gi, bi ne aknib umigan alarj okok abe, bin bi ne ognap sek abe, Jisas nop aglak, “Minim sid tikil apan wagin ak tari?” aglak. ¹¹Agelak agak, “God bin bi dil kod midenigab minim ak, God gek nibi nipim ak pen bin bi okok kirop sid tikil nep ag ñebin. ¹²Ñig gen, bi God minim agep alap God Minim ñu kil tikil agak rek nep ginigab. Ne agak, ‘Udin niñnigal ak pen tap ognap ma niñnigal.

Minim niñnigal ak pen minim wagin ageb nib gil rek agil ma niñnigal. Niñ rep giplap, God nop ag niñeblap, tap si tap timel gipal okok niñil kirig gipkop,’ aglak,” agak.

Jisas bi tap yij yimib minim sid tikil agak ak, minim wagin ak ag ñak

(Mat 13:18-23; Luk 8:11-15)

¹³Jisas nib agil kirop agak, “Minim sid tikil agesin nibak ma nepim ak, kisen minim ognap sek sid tikil agenigain ak, titi gil niñnigabim?” agak. ¹⁴Wid yij bi di yoknigab, agesin ak, God Minim ne ak, agil, agesin. ¹⁵Yij ognap kanib ameb ar siñak yonigab, agesin ak, bin bi okok God Minim niñnigal ak pen magil nibak nep Seten apil minim nibak ju dad amnigab, agil, agesin. ¹⁶⁻¹⁷Pen yij ognap kab ar lim sikol sikol linigab siñak yapil, tannigab ak pen kidil yipil amil kilis ma gek, pib niñil milep ginigab, agesin ak, bin bi okok God Minim ak kisen won ak niñel, tep gek niñlig gi, miñ miñ gilig gi kasek dinigal ak pen yokop ulep magil ak midel niñlig gi, miker ognap apenigab aka bi okok kirop gi timel genigal niñil minim nibak kasek nep kirig ginigal, agil, agesin. ¹⁸Yij ognap kilikasik nab siñak yapil tannigab, agesin ak, bin bi God Minim niñnigal ak pen ¹⁹wög wari, karip mij kineb, kaj tap okok gos par niñil, tu kibap, kilnok mani tap okok gos par niñil, tap okok okok nep gos niñnigal ak me, God Minim ak sau gi pak ñibek, magil ma pilnigab, agil, agesin. ²⁰Wid yij lim tep ar siñak yonigab, agesin ak, bin bi God Minim niñil, niñ denigal niñil magil ñin juil nokim alap adik gi dam wajrem alarj (30), aka ñin juil omal nokim (60), aka ñin juil aknib mamid alarj (100) rek pilnigab; gos nibak niñil agesin me ak,” agak.

Jisas minim sid tikil agak, bin bi yad kiri sip melik rek midebal, agak

(Luk 8:16-18)

²¹Jisas pen kauyarj minim alap sid tikil agak, “Bin bi okok sip dagil tin cög miñan okok aka abañ ar kinebal mok okpi okok ma we ginigal; ar

epel di lel melik ginigab. ²²Nib aknib rek, tari tari miñi we gil mideb ak, kisen miseŋ lek niŋnigal. ²³Nibi bin bi gos timid midonimiŋ okok, minim agebin aul timid li niŋ tep ginimib,” agak.

²⁴Kirop minim alap agak, “Minim niŋebim ak, tik dam niŋ tep ginimib. Nibi bin bi okok kirop minim kib agil, pen titi rek ñim agnigabim ak, God ne niŋil nibep ke ak rek nep minim kib agil, pen ak rek nep aknib rek ñim, agnigab. Pen ne nibep pen ognap sek ar alaŋ abe ñim, agnigab. ²⁵Bin bi tap ognap mideb okok ognap sek dinigal; pen bin bi tap ognap ma mideb okok, tap ognap sikol sikol mideb ak sek dad amnigal.

Krais minim tep ak ag ñel amek, bin bi koŋai nep niŋ dinigal

²⁶Jisas minim alap minim sid tikil agak, “God bin bi dil kod midenigab ak, kesim agniŋ gebin ar aul rek mideb. Bi wög nap alap wid yiŋ tanaŋ, agil, dam wög dai ne okok yoknigab. ²⁷Wid yiŋ wög dai siŋak yokil, kin tagek niŋlig gi, marip gil, tannigab. Titi gil tanib, agil, ma niŋnigab. ²⁸Lim ak ke gek, silip ap ran jakil, tanil, magil pilil, pok ginigab. ²⁹Pen wög dai nap nib ak pok gek niŋil, tik dam lep ñin ak owip, agil, tu gomej ak damil, tik donigab,” agak.

Jisas mab mastad ak, minim sid tikil agak

(Mat 13:31-32; Luk 13:18-19)

³⁰Jisas nib agil agak, “God bin bi dil kod midenigab ak, kesim tari rek dil agen niŋnigabim? ³¹⁻³²Me, mab mastad yiŋ rek ak agnigain. Tap yiŋ ognap kib yimebal okok sikol taneb, pen mab mastad yiŋ ak sikol yib yimel, tan kib gil, tam kib ñagek, yakir okok apil sisi nib okok li midebal,” agak.

Jisas bin bi okok kirop minim sid tikil nep ag ñoligip

(Mat 13:34-35)

³³Jisas bin bi okok kirop minim sid tikep nib okok rek koŋai nep ag ñoligip; niŋ gil, minim tep ak kirop ag ñoligip. Kiri minim niŋ tep ginigal minim ak nep kirop ag ñoligip; minim niŋ tep ma ginigal minim ak ma ag ñoligip. ³⁴Ne kirop minim sid tikil nep ag ñoligip. Kisen bi ne okok eip ke midlig gi, minim wagiŋ magilsek ag ñi tep goligip.

Jisas agek, asad kir gak

(Mat 8:23-27; Luk 8:22-25)

³⁵Ñin nibak nep kariŋ bir diŋip won ak, Jisas bi ne okok kirop agak, “Ñig cöb pis kid adaŋ amnin,” agak. ³⁶Nib agek, bi ne okok bin bi koŋai nep ap midelak okok kirop kirig gil, ñig magöb Jisas midek miŋan ak tanil, paŋdilak. Ñig magöb ognap sek eip amnilak. ³⁷Nab amel niŋlig

gi, dai pinem asad apil, ñig si pag ñig magöb migan ak amil pige ap yonig rek gak. ³⁸Jisas ne pen ñig magöb migan dai onjid ar, nabic yir lil kinek niñlig gi, bi ne okok nop am kaun gil aglak, “Minim ag ñeb bi, cin magilsek kimnig gobin ak nak niñesan tap yokop rek lip ar?” aglak. ³⁹Agelak, Jisas warikil, pinem asad dek ak abe, ñig si pag apek ak abe, kapkap midei, agek, pinem asad dek ak kir gil, ñig si pag apek ak pis nep kir gil gak.

⁴⁰Pen Jisas bi ne okok kirop agak, “Nibi tari ginig pirikebim? Niñ dep magil nibi sikol yib mideb niñil pirikebim aka?” agak. ⁴¹Agek, kiri wal agil, pen ag niñek pen ag niñek gil aglak, “Bi nibaul bi an? Titi gil agosip, pinem asad dosip ak abe, ñig si pag aposip ak abe, minim nop ak niñil, agosip rek gip?” aglak.

Kijeki bi alap nop abañ ñag midek ak, Jisas ag söñ yokak
(*Mat 8:28-34; Luk 8:26-39*)

5 ¹Jisas bi ne okok eip ñig magöb dil, Ñig Cöb Galili juil, karip lim Gerasa bin bi midelak pis kid adañ ar amjakil, ²ñig magöb ak kirig gil, preñid yapek niñlig gi, won nibak nep, kijeki abañ ñag midek bi alap, cip tigel migan okok niñ apil, Jisas midek siñak owak. ³⁻⁴Bi nibak cip tigel gilak kab migan okok kin tagoligip. Nop per sen dil, ñin tob ne okok li tibikeligipal ak pen sen okok gek, pig gi rikek, amoligip. Ne kilis yib goliñip ak me, nop gel gos niñnimiñ rek ma lak. ⁵Pib nab, kislím eyañ, cip tigel gilak kab migan okok abe, ñim gol okok abe, gaul par gilig gi, kab dil miñ goñ ne ke tiboligip. ⁶Pen ñin nibak, ne Jisas nop yipid niñil, pig gi rikid ag amil, Jisas midek siñak kogim yimak. ⁷⁻⁸Ne kogim yimek, Jisas kijeki bi nibak nop abañ ñag midek ak nop agak, “Nak kijeki kiyob ñilik, bi aul nop kirig gil söñ amnoñ!” agak.

Jisas niñ agek, ne pen agak, “Jisas, God kilis akniñ ke yib Ñi ne. Yip tari ginig apeban? Minim niñid agnimin, ‘God niñ mideb rek, yad nep yur mab rek ma ñinigain,’ agnimin!” agak.

⁹Niñ agek, Jisas bi nibak nop agak, “Yib nak tari?” agak.

Jisas niñ agek, ne pen agak, “Yip kijeki koñai nep abañ ñagip rek, yib yad ‘Koñai Nep,’ ” agak. ¹⁰Ne Jisas nop, kijeki kiyob ñilik okok miñ mab ke par okok ma ag yoknimin, agil, ag niñlig gi nep midek.

¹¹Pen magil niñak, kaj koñai yib amil ñibelak pibak niñ okok. ¹²Niñ ak, kijeki okok Jisas nop neb neb gil aglak, “Cinop agek, amil kaj oklañ kirop mijem sikiñ,” aglak.

¹³Niñ agel, Jisas yau agek, kijeki okok bi nibak nop kirig gil, amil kaj okok kirop mijem sikel, magilsek tu tausan rek pig juil midin eyañ amil, gi dam ñig cöb eyañ pakil, magilsek ñig ñibil kim saklak.

¹⁴Pen bi kaj mikelak okok, gak niñak niñil, kasek amil taun niñak abe, karip lim okok abe, minim niñak ag ñel niñlig gi, bin bi okok amil niñin,

agil, Jisas midek siŋak olak. ¹⁵Apil niŋlak, bi ned kijeki koŋai nep aban ŋagak nibak, walij yimil, mid tep gil, bisig midek. Niŋel, jel gek piriklak.

¹⁶Bin bi ned midelak okok, bin bi kisen olak okok kirop, bi kijeki aban ŋag midek bi ak nop Jisas tari tari gak ak ag ŋilak. Pen kaj okok kirop tari tari gak ak abe ag ŋilak. ¹⁷Pen bin bi nib okok, minim aglak nibak niŋil, Jisas nop minim neb neb gil aglak, “Karip lim cin aul kirig gil amnoŋ!” aglak. ¹⁸Agelak, Jisas ŋig magöb dil amnig gek, bi kijeki aban ŋagak Jisas gek komiŋ lak bi ak nop neb neb gil agak, “Yad eip amnr aka?” agak. ¹⁹Agek, Jisas bi ak nop mer agil, agak, “Karip nak amil, bin bi nak okok kirop, Bi Kib nep yimig yib niŋil, tari tari gip minim ak magilsek ag ŋinimin,” agak. ²⁰Agek, bi nibak karip lim Dekapolis nab siŋak, taun okok gi taglig gi, Jisas nop tari tari gak minim nibak magilsek bin bi okok kirop ag ŋek, kiri magilsek wal yib aglak.

Jisas gek, bin alap komiŋ lak, pai kimak alap warikak

(Mat 9:18-26; Luk 8:40-56)

²¹Jisas pen ŋig magöb dil, kauyaŋ adik gi amil, Ŋig Cöb Galili pis kid adaŋ gol siŋak midek niŋlig gi, bin bi koŋai nep apil ne midek siŋak bim kib gilak.

²²Bi alap yib ne Jairas. Ne Juda mogim gep karip alap kod midoligip. Jairas Jisas nop niŋil, apil midek siŋak kogim yimil, ²³nop neb neb gilig gi agak, “Pai sikol midmagil yad ak kimnig geb. Nak yad eip apil nop di niŋek, warik komiŋ amnaŋ,” agak. ²⁴Agek, Jisas Jairas eip amer niŋlig gi, bin bi koŋai nep amil, Jisas nop cirok cirok ŋilig gi nab nab lilig gi dad amelak.

²⁵Pen bin alap, ne bin kanib ajoligip mi aknib umigan alaŋ midek. ²⁶Bin nibak soi ŋon gep bi okok kirop, yip gel komiŋ laŋ, agil, mani ne magilsek bir tauak ak pen nop gel komiŋ ma lil, tapin kib yib gak. ²⁷⁻²⁸Pen ne Jisas goligip minim ak agel niŋak rek, amil walij bad nop ak di niŋen komiŋ linigab, agil, bin bi koŋai midelak nab siŋak kid ken apil, walij nop ak di niŋek, ²⁹magil nibak nep lakaŋ yapoligip ak milep gek, nab ne siŋ eyaŋ niŋak, nop tap gak ak komiŋ lak. ³⁰Pen Jisas dai ke niŋak, kilis ne ognap amnak niŋil, adik gil, bin bi koŋai midelak okok kirop agak, “Walij yip ak bi an di niŋip?” agak. ³¹Agek, bi ne okok aglak, “Bin bi koŋai sikerek nep cirok marok ŋebal ak, tari ginig yip bi an di niŋip, agil, ageban?” aglak. ³²Pen Jisas minim kiri aglak ak ma dil, yip bi an di niŋip, agil, piyo niŋlig gi midek. ³³Pen bin nibak, nop tari tari gak ak niŋil, pirikil jep jep dilig gi apil, Jisas midek tob wagin ne siŋak kogim yimil, nop komiŋ lak minim ak magilsek misen ag ŋak.

³⁴Jisas pen nop agak, “Pai yad. Jisas yip gek komiŋ linigab, agil, niŋ dipan rek, nep gen komiŋ lip me ak. Nak amil kapkap mid rep ginimin,” agak.

³⁵ Jisas minim nibak agek niŋlig gi, Jairas bi ne ognap, karip ne siŋak nib apil aglak, “Pai nak ak bir kimib; ag ñeb bi aul agek, tob yur ma onimiŋ, adik gi amnimiŋ,” aglak. ³⁶ Nib aglak ak pen Jisas minim kirop ak ma dil, Jairas nop agak, “Ma piriknimin; gos kilis gi niŋnimin,” agak. ³⁷ Jisas nib agil, bin bi okok eip ma amniŋabin, agil, kirop nib okok ag lil, Pita ak, Jems ak, Jems nimam Jon ak, kirop yakam nep poŋ dil amnak. ³⁸ Kiri Jairas karip ak amjakil Jisas niŋak, bin bi minim pig agil, sil magil kib yib aŋlig gi midelak. ³⁹ Karip ñilik miŋan eyaŋ amiŋ agak, “Tari giŋig minim saköl agil, sil agebim? Pai ak ma kimib; yokop wisin kineb,” agak. ⁴⁰ Nib agek, nop sik agel, kirop ag mis yokil, pai nonim nap ber ak dil, bi ne ñon ak dil, poŋ dil pai ak kim midek karip ñilik miŋan eyaŋ amnak. ⁴¹ Amiŋ, pai nibak ñinmagil kid nop ak dil, Arameik minim lil agak, “Talita kom!” agak. Minim agak nibak wagin me, “Pai sikol! Nep agebin, warikan!” ⁴² Jisas pai nibak nop minim agek, magil nibak nep warikil, ap ran ap yap gek niŋlig gi, bin bi okok niŋil wal yib aglak. Pai nibak mi ne aknib umiŋan alaŋ amnak. ⁴³ Bin bi midelak okok wal agel niŋlig gi, Jisas minim kilis agil agak, “Gipin nibak bin bi okok kirop miseŋ ma ag ñinimib,” agak. Nib agil kirop agak, “Pai ak nop tap magil ognap ñem niŋaŋ,” agak.

Nasaret bin bi Jisas nop ma niŋ dilak

(*Mat 13:53-58; Luk 4:16-30*)

6 ¹ Jisas bi ne okok poŋ dil karip lim nibak kirig gil, taun ne ke Nasaret amnak. ²⁻³ Am midil, Juda God nop sobok gep ñin ak, mogim gep karip ak amiŋ, bin bi koŋai nep ap midelak okok kirop minim ag ñek niŋlig gi, wal agil aglak, “Bi nibaul kapeda karip lim aul nib bi ak, Maria ñi ne alap. Nimam ne ak Jems, Josep, Judas, Saimon me. Ninai sikop ne okok eip midobin aul. Pen minim tep nibak akal nib niŋil ageb? Tap ma gep rek titi gil geb?” aglak. Nib agil, nop gos timel niŋil kid ñilak.

⁴ Pen Jisas kirop agak, “Bi God minim agep okok, karip lim miŋan ognap gi tagel, bi kib cin, agil, diŋigal ak pen karip lim kiri ke siŋak gi tagel, bin bi yakam kiri ke okok minim kirop ma diŋigal,” agak. ⁵ Nop ma niŋ dilak ak me, tap ma gep rek ognap giŋimiŋ rek ma lak; bin bi tap gak okok omal nep di niŋek, komiŋ lak. ⁶ Pen Nasaret bin bi nop ma niŋ dilak ak niŋil Jisas ne wal yib agak.

Jisas bi ne aknib umiŋan alaŋ, wög yip giŋimib, agil, ag yokak

(*Mat 10:5-15; Luk 9:1-6*)

Jisas pen karip tiriŋ tironj karip lim nib okok gi aŋlig gi, bin bi okok kirop God Minim ak ag ñak. ⁷ Ñin alap bi ne aknib umiŋan alaŋ okok sik agek apelak agak, “Bi omal ke, bi omal ke, karip lim okok ke ke

amil, minim tep yad ak ag ñinimib. Yad nibep ag yokebin rek, minim ag ñi ajlig gi, kijeki kiyob ñilik tap okok ag yoknig, ag sön yoknigabim,” agak. ⁸Minim alap pen agak, “Amnig gil ak, tap ñiñeb, wad, mani dad ma amnimib; yir dai ak nep dad amnimib. ⁹Tob tirip lil pen sior par nokim alap nep lil amnimib; sior ognap sek dad ma amnimib. ¹⁰Karip alap amem nibep ag denimel, karip nibak nep midil, wög gi dai juil, taun nibak kirig amnig ginimib ñin ak nep amnimib. ¹¹Pen karip lim alap amjakem nibep ag dil, minim nibep ak ma niñenimel, karip lim nibak kirig amnig ginimib ñin ak, niñlan, agil, tob silikil pakem yapek amnimib,” agak. ¹²Jisas nib agek, bi ne aknib umigan alan okok kiri karip lim tigoñ tigoñ amil, bin bi okok kirop minim ag ñilig gi aglak, “Tap si tap timel gipim ak, tari ginig nig gipin, agil, kirig ginimib,” aglak. ¹³Nib agil, kijeki kiyob ñilik bin bi abañ ñag midek okok koñai nep ag sön yokil, bin bi tap gak okok koñai nep wel li ñel, komiñ lak.

Herod agek, Jon Bi Ñig Pak Ñeb nabic cög ne ak tib gi rik gilak
(*Mat 14:1-12; Luk 3:19-20; 9:7-9*)

¹⁴Pen Jisas gak rek minim ak, karip lim tigoñ tigoñ okok amek, kiñ Herod ak rek nep niñak. Bin bi okok, minim nibak ag amil apil gilig gi, ognap aglak, “Jon bi ñig pak ñeb kimek tigel gilak ak, kauyañ warikil me, apil tap ma gep rek nib okok geb,” aglak. ¹⁵Ognap aglak, “Bi nibak bi nak Ilaija,” aglak. Pen bi ognap aglak, “Bi God minim agep birarik nep mideligipal rek bi alap apil mideb,” aglak. ¹⁶Pen kiñ Herod ne niñil agak, “Ak Jon bi ñig pak ñeb ned kiñam tib gi rik ginek ak nep warikil, apil nig geb,” agak.

¹⁷⁻¹⁹Pen tari: ned Herod, nimam Pilip bine Herodias nop dak. Dek, Jon “Gipan nibak, gi timel gipan. Bi nuwi ne ma dinigab,” agak. Pen Jon nib agek, Herodias Jon nop niñek milik yapek agek, Herod bi ne okok ognap ag yokek, amil Jon nop miñ lilak. Bin Herodias, Jon nop titi gil ñag pak linim, agil, gos ak nep niñoligip ak pen ²⁰Jon tap timel alap ma goligip. Ne minim tari tari agak ak, Herod niñil minim tep yipid gil nep ageb, agil, miñ miñ gil, Jon ne bi tep alap bi siñ alap mideb, agil, pirikil, Herodias nop gi timel ginigab, agil, nop kod mid tep goligip. ²¹Bin Herodias, Jon nop ñag pak lin, agil niñ mid mid, minek alap, Herod nonim nop tik dowak kos tikep ñin ak nep, tap kib ñiñnig, gapman bi kib okok, ami bi kib okok, karip lim Galili bi kib okok sik agek, tap kib ñiñnig olak. ²²Apil tap ñibel niñlig gi, Herodias pai ne ak karip miñan nibak apil kogim pagek, Herod abe, bi kib ne eip tap ñib midelak okok abe niñel, kirop tep gek, kiñ Herod pai nibak nop agak, “Tap tari ag niñenigan, nep ñinigain,” agak. ²³Pen minim kilis, minim niñid yib nep agil agak, “Yad nep minim niñid yib agebin, nak tap tari ag niñenigan ak nep ñinigain. Karip lim kib kod midebin aul ag niñenigan, nep dai

ak agen, kod midenigan,” agak. ²⁴Nib agek, pai ak amil nonim Herodias nop, tap tari ak ag niñnim, ag niñek, nonim pen agak, “Jon bi ñig pak ñeb kimig cög magil ne ak agninin,” agak. ²⁵Nonim nib agek, dai pai ne kasek kiñ Herod midek siñak amil agak, “Miñi won aul nep, Jon bi ñig pak ñeb kimig cög magil ne ak di kinañ cög migan alap lil, yip dap ñan,” agak.

²⁶Nib agek, kiñ Herod Jon nop gos niñek, mapin yib gak. Pen ne bi kib okok niñ midel niñlig gi, minim kilis minim niñid yib pai ak nop agak ak nep gos niñil, ²⁷magil nibak nep ami bi ne alap, “Amil Jon nabic cög magil ak dowan,” agil ag yokek, amil Jon nop nabic cög magil ne ak tib gi rik gil, ²⁸di kinañ cög migan alap lil, dapil pai nibak nop ñek, ne pen damil nonim nop ñak. ²⁹Pen Jon bi ne okok, Jon nop kiñam tib gi rik gilak minim ak niñil, kiri am cip se damil, kab migan siñak tigel gilak.

Jisas bin bi koñai nep tap magil ñek ñiñlak

(Mat 14:13-21; Luk 9:10-17; Jon 6:1-13)

³⁰Jisas minim dad ameb bi okok, kiri tigoñ tigoñ wög gi taglig gi, adik gi apil, bin bi okok kirop minim tari tari ag ñil, tap tari tari gilak okok, magilsek Jisas nop ag ñilak. ³¹Pen bin bi koñai yib nep amil apil gelak ak me, Jisas bi ne okok eip tap ñiñnimel rek ma lek, ne kirop agak, “Cin, bin bi ma midebal nab siñak amil, yokop midojin, nibi magil alap ake linigabim,” agak. ³²Nib agil, bi ne okok eip ñig magöb dil, karip lim bin bi ma mideligipal siñak amnilak. ³³Pen kiri ñig magöb dad amel niñlig gi, bin bi koñai nep, Jisas bi ne okok eip tigoñ ke alap amebal, agil, taun okok nib okok nib kasek pig gi rikid ag amil, ñig gol ar kanib par ak ned amil, Jisas bi ne okok eip amnig gelak siñak ned am midelak. ³⁴Jisas bi ne okok eip ñig gol siñak amjakil wös gil, ñig magöb kirig gil, bin bi koñai midelak okok kirop niñil, gos ne ke gos niñil niñak, kiri kaj sipsip bi kod midep alap ma mideb rek ak midelak. Nibak niñek, mapin gek, ne wagin gil kirop minim ognap tapin ag ñi midek. ³⁵Pib bir pañid amek niñlig gi, bi ne okok apil nop aglak, “Pib bir pañid amib. Siñaul miñ mab nep nab siñaul. ³⁶Nib ak, bin bi siñ aul ag yokek, kiri amil karip tirig tiroñ karip lim yokop ulep siñ aul amil, tap magil kiri ke ognap tau ñiñlanj,” aglak.

³⁷Agelak, Jisas agak, “Nibi ke kirop tap magil ognap ñinimib,” agak. Agek aglak, “Nib ageban ak, bi takin aknib jil onjid wög gil mani dipal rek dil, tap magil tau dapil kirop ñin aka?” aglak. ³⁸Agelak, Jisas agak, “Bred magil nibi titi gi rek mideb? Am niñim!” agak. Agek, am niñil aglak, “Cin bred magil aknib mamid alañ, kipsal omal sek mideb,” aglak. ³⁹Nib agelak, Jisas agak, “Bin bi siñ aul agem, asik bilok ke ke lil, tap kas kikomiñ ar siñ aul bisig midel amnanj,” agak. ⁴⁰Agek, bin bi okok kirop agel, ognap ñin juil omal adik gi dam wajrem alañ (50) rek mogim bilok

lil, ognap ñon bin bi ñin juil aknib mamid alaŋ (100) rek bilok lilak. ⁴¹Pen Jisas ne bred magil aknib mamid alaŋ abe, kibsal omal abe dil, seb kab ar alaŋ siŋak niŋil, God nop, tep agil, bred ak di ti paŋil, bi ne okok kirop ñek, kiri pen bin bi okok kirop nonim li ñilak. Kibsal omal ak, ak rek nep bi ne okok ñek, bin bi okok kirop nonim li ñilak. ⁴²Ñelak, ñibel ñibel, kirop kogi gak. ⁴³Bred kibsal dai dai ñib tirauñ gilak okok, Jisas bi ne okok wad dil yigel yigel, wad aknib umigan alaŋ ap ran jakak. ⁴⁴Tap ñiŋlak ñin nibak, bi okok nep me, paip tausam amnak.

Jisas ñig kas ar ak taulig gi amnak

⁴⁵Pen magil nibak nep Jisas bi ne okok kirop agek, ñig magöb dil, Betsaida taun kid adaŋ amel niŋlig gi, Jisas siŋak midil bin bi okok kirop ag yokek amnilak. ⁴⁶Ag yokil, dim gol mak alap kilan gil amil, God nop sobok gi midek.

⁴⁷⁻⁴⁸Kislim ginig gek magil ak, Jisas nep midil niŋak, bi ne okok kiri ñig magöb dil, ñig nab siŋak adaŋ amel niŋlig gi, yigen ak amelak pis ken apek, koslam ñig kas ar alaŋ parik yoklig gi amelak. Karip jin parikek won ak, Jisas ñig kas ar alaŋ bi ne midelak siŋak amil, kirop tausak lil, amniŋ gek niŋlig gi, ⁴⁹⁻⁵⁰nop ñig kas ar alaŋ siŋak amek ak niŋil, ak cip kaunan alap, agil, jel gek pirikil sik gaul gilak. Dai Jisas kirop agak, “Gos par ma niŋnimib! Yad nep apebin! Ma piriknimib!” agak. ⁵¹Agil, ñig magöb miŋan eyaŋ amek, yigen dek ak kir gak. Niŋ gek, Jisas ne titi gil niŋ gip, agil, gos par yib niŋlak. ⁵²Ne bred dil bin bi koŋai nep nonim li ñak ak niŋlak ak pen ñin nibak Jisas nop niŋ di tep ma gilak. ⁵³Pen ñig nab siŋak amil amil karip lim Genesaret amjakil, ñig magöb ak nag di ñon gi lilak. ⁵⁴Ñig magöb siŋak kirig amel niŋlig gi, bin bi nib okok Jisas owip, agel niŋlig gi, ⁵⁵kasek karip lim tiŋoŋ tiŋoŋ kid kid amil, bin bi tap gak okok kirop dam Jisas am midek siŋak dapelak. ⁵⁶Ñin nib okok, Jisas karip tiriŋ tiroŋ okok aka taun okok aka karip lim yokop okok amjakek, bin bi tap gak okok kirop dap maker nab siŋak lil, Jisas nop neb neb gil aglak, “Nak midek, bin bi tap gip okok, walij dai nep ak di niŋel, kirop komiŋ laŋ,” aglak. Jisas yau agek niŋlig gi, bin bi nop di niŋlak okok kirop magilsek komiŋ lak.

Tap cibur midmagil nab adaŋ nib söŋ oniŋab ak nep me acir mideniŋab

7 ¹Bi Perisi ognap, bi lo minim ag ñeb ognap, Jerusalem nib apil, Jisas midek siŋak niŋ midil, ²kiri niŋlak Jisas bi ne ognap, nipis nised sikop asik mosik gi rep gil, ñinmagil ñig li yokil nep tap ñibeligiŋal rek, ma gelak. ³(Perisi bi okok abe, Juda bin bi okok magilsek abe, nipis nised sikop ageligipal rek niŋil, ñinmagil ñig li yokil nep, tap ñibal. ⁴Maker nab siŋak am midil, karip adik gi apil, ak rek nep ñig li yokil nep, tap ñibal. Pen kap, tin cög, kapa, mij par kineb tap okok ak rek nep ñig li yokil nep, tap ñibal. Tap nibak rek magilsek kil tep gipal.)

⁵Nib ak, Jisas bi ne okok tap yokop ñiñlak ak niñil, bi Perisi okok abe, bi lo minim ag ñeb okok abe, Jisas nop aglak, “Bi nak okok tari ginig, apis based sikop aglak rek, ñinmagil kiri ak ñig li yokil mer, yokop nep tap ñibebal?” aglak. ⁶Agelak, Jisas pen agak, “Nibi minim tom agebim ak, Aisaia minim niñid yib agil, God Minim ak ñu kil tikil agak,

‘Bin bi siñ aul, God yib agon ar ameb apal ak
pen yokop minim nep apal; yip midmagil ma lipal.

⁷God lo minim ak ag ñobin, apal ak
pen bin bi minim kiri ke apal minim ak nep ag ñebal.

Nib ak, yip sobok gil yib yad agel ar ma ameb.

Yokop minim nep agebal,’ agak.

⁸Ar nibak rek, nibi God minim ag lak ak kirig gil, bin bi minim kiri ke apal ak dil, nap nased sikop ageligipal ar ak kisen gipim,” agak.

⁹Jisas kirop kauyañ agil agak, “Nibi gos kid yik niñil, God minim ag lak ak di ke okok yokil, gos magil nibi ke ak nep niñ dil kisen gipim. ¹⁰Mosis God Minim dai alap ñu kil tikil agak, ‘Nanim nap agnimir rek niñ dil, kirop di tep ginimib; pen ñi pai ognap nonim nap kirop minim milik kal yapek agenigal ak, nibi kirop ñag pak lem kimlan,’ agak. ¹¹Pen nibi minim ar nibak yipid gil ma ag ñibim. Bi alap, nonim nap kirig ginigain, agnigab ak, kirop agnigab, ‘Ami bapi, yad tap tep ognap nirepe mal ñibnep ak pen mani nirep mal ñeb mani ak, miñi yad God nop ñinigain, apin ak me, mani nirep mal ñeb alap ma mideb,’ agnigab. ¹²Nig gel, nibi niñil agnigabim, ‘Kiri nig gipal ak, minim ma mideb,’ agnigabim. Nib agem, kiri God Minim ak kirig gil, tap tep ognap nonim nap kirop ma ñinigal. ¹³Nib ak, gos magil nibi ke ak nep niñil, kisen gil, bi kisen nib ognap sek ag ñem, kiri pen ak rek nep bi kisen nib ognap ag ñel, ag ñi dam dapil gel niñlig gi, God Minim tap yokop rek di ke okok yokpal. Pen nonim nap minim agesin ak nep mer; nibi tap koñai nep nig aknib rek nep gipim,” agak.

¹⁴Jisas nib agil, bin bi koñai nep midelak okok kirop agek, ne midek wagin siñak apelak agak, “Minim agnig gebin aul nibi magilsek niñil, minim wagin tik niñ tep ginimib. ¹⁵Nibi tap ñibem nab eyañ amnigab ak gac ma midenigab; tap cibur midmagil nab nibi adañ nib sön onigab ak nep gek, nibi acir sek midenigabim. ¹⁶Nibi bin bi gos timid midonimij okok, timid li niñ tep ginimib,” agak.

¹⁷Jisas nib agil, bin bi okok kirop kirig gil, kariñ ñilik migan eyañ amek, bi ne okok nop ag niñlak, “Minim sid tikil apan nibak, wagin ak tari?” aglak. ¹⁸Agelak, agak, “Bin bi okok kiri ma nipal rek, nibi ak rek nep ma nipim ar? Tap asik mosik gipal okok, abramek ñibel, cibur nab eyañ amnigab, God niñip gac ma mideb. ¹⁹Pen tari: tap ñibal nib okok, midmagil nab eyañ ma amnigab; cibur nab eyañ nep amek, cib sek kil yoknigal,” agak. Jisas minim agak nibak, tap okok magilsek ñineb ak nep mideb, asik mosik gep tap alap ma mideb, agak.

²⁰Pen Jisas nib agil agak, “Gos timel nab kiri eyañ nib onigab ak me, bin bi acir sek midenigal. ²¹Bin bi okok nab kirop eyañ gos timel apek niñlig gi, kiri gi timel gil, tap si dil, cip ñagil, bin si bi si gil, ²²tap okok cin rek lañ, agil, bin bi ognap gos timel niñil, minim esek agil, minim timel agil, tap okok cin rek ma lip, agek, milik yapek, bin bi ag juil, yib kiri ke dap ranil, abramek gil, timel gep gos nokim niñil gipal. ²³Tap timel gipal nib okok gos ke okok nib ma owip. Gos timel nab kiri eyañ nib onigab ak me gek, bin bi God udin yirik ar ne siñak gac sek midebal.

Bin alap, Jisas ne gek pai yad komiñ linigab, agil, niñ dak
(*Mat 15:21-28*)

²⁴Jisas karip lim nibak kirig gil, amil karip lim taun kib Taia ulep nib siñak amnak. Amil, bin bi okok yip miñi ma niñnimel, agil, karip ñilik miñan alap amil we gil midek ak pen we gil midonimiñ rek ma lak. ²⁵Bin alap, pai ne nop kijeki abañ ñagak ak me, Jisas owip, agel, ne amil Jisas midek siñak tob wagin nop siñak kogim yimil, ²⁶Jisas nop neb neb gilig gi agak, “Pai yad kijeki abañ ñagip ak, ag sön yokek amnañ,” agak. Bin nibak ne Juda bin mer. Ne tik dolak karip lim Pönisia, bi karip lim Siria nib kod mideligipal ak. ²⁷Pen nib agek, Jisas nop agak, “Ned ñi pai tap ñibel, kogi ginigab ak tep. Tap magil ñi pai ñeb ak dil, kain yokniñabin ak tep ma ginigab,” agak. ²⁸Agek, bin ak pen agak, “Bi Kib! Ak tep ageban ak pen ñi pai okok tap ñibel, dai dai okok abañ mok okok yapek, kain okok sek niñnigal,” agak. ²⁹Agek, Jisas minim nibak niñil agak, “Nak nib apan ak, pai nak kijeki yipil sikil midosip ak bir mis amib; nak amnoñ,” agak. ³⁰Jisas nib agek, bin nibak adik gi amil niñak, kijeki kirig mis amek, pai ne mij ar siñak kapkap kin midek.

Timid miñan piliñ gak bi alap Jisas gek, timid wakak

³¹Jisas karip lim taun kib Taia ulep nib siñak kirig gil, amil karip lim taun kib Saidon ulep nib siñak pakil, karip lim Dekapolis nab okok amil, Ñig Cöb Galili amnak. ³²Amjakek niñlig gi, bin bi okok bi timid piliñ gak minim ag tep ma goligip bi alap dapil, Jisas nop neb neb gil aglak, “Bi aul nop di niñek, komiñ lañ,” aglak. ³³Agelak, Jisas bi nibak nop poñ dil ke ke siñak amil, ñinmagil par ne ak timid miñan nop ak yokil, ñinmagil kiñik ñagil, aleb nop ak di niñil, ³⁴seb kab lañ niñil, ake lilig gi, “Epata!” agak. Minim yib agil, “Epata,” agak ak, minim wagin ak “Yikan,” agak. ³⁵Nib agek niñlig gi, bi nibak timid miñan ak pag yikil, aleb ne auan amek niñlig gi, dai minim yipid gil agak. ³⁶Jisas pen bin bi okok kirop agak, “Minim nibak bin bi ognap kirop ma ag ñinimib,” agak. Minim nibak minim kilis gil agak ak pen kiri amil kilis gil bin bi koñai nep ag ñilak. ³⁷Minim nibak ag ñelak bin bi niñil wal yib agil aglak, “Jisas tap okok magilsek gosip tep yib gip. Ne bin bi timid piliñ gip okok gek, pag yikil, bin bi aleb miker gip okok gek minim ag tep gipal,” aglak.

Jisas bin bi koñai yib nep tap magil ñek ñiñlak
(*Mat 15:32-39*)

8 ¹Ñin nab nib siñak nep, bin bi koñai nep ap midel, tap magil ma midex, Jisas bi ne okok sik agek apelak agak, ²“Yad bin bi siñ aul kirop yimig niñebin. Ñin omal nokim yad eip midil, yokop midebal. ³Kirop yuan nep ag yoken, ognap par okok nib opal rek, kanib nab okok amil, udin mimain dek, yap paknigal,” agak. ⁴Agek, bi ne okok aglak, “Miñ mab nep nab nib siñ aul, tap magil akal nib dil ñin?” aglak. ⁵Agelak, Jisas agak, “Bred magil nibi titi gi rek mideb?” agak. Agek aglak, “Aknib ar oñid ak,” aglak. ⁶Nib agel, Jisas bin bi okok kirop agek, bisigel niñlig gi, bred magil aknib ar oñid nibak dil, God nop tep agil, ti pañil, bi ne okok kirop ñek, kiri pen dil, bin bi okok kirop nonim li ñilak. ⁷Kibsal sikol bad alap di midelak ak, ak rek nep dil, God nop tep agil, bi ne okok kirop ñek, dil nonim li ñilak. ⁸Ñel, ñibel ñibel kirop kogi gek, dai dai yepil yepil gilak okok, Jisas bi ne okok wad aknib ar oñid ak yigel ap ran jakak.

⁹Bi tap ñiñelak nib okok, po tausan rek. Jisas pen, bin bi nib okok kirop ag yokil, ¹⁰bi ne okok eip ñig magöb dil, karip lim Dalmanuta amnilak.

Perisi bi ognap, “Tap ma gep rek alap gek niñin,” aglak
(*Mat 16:1-4; Luk 12:54-56*)

¹¹Bi Perisi ognap Jisas nop neb neb gon, tari rek agnimiñ, agil, apil nop eip minim ag amil apil gil aglak, “Tap ma gep rek alap seb kab ar alañ siñak gek, cin niñil, God nep ag yokek opan, agil niñnigabin,” aglak. ¹²Nib agel, Jisas ake lilig gi agak, “Bin bi miñi midebal ñin aul, tari ginig apal, ‘Tap ma gep rek alap gek niñin,’ apal? Yad nibep niñid yib agebin, nibep tap ma gep rek alap gen, ma niñnigabim,” agak.

¹³Nib agil, kirop kirig gil, bi ne okok eip ñig magöb dil, ñig cöb pis kid adañ amnilak.

Jisas, bi ne okok bin bi Perisi minim esek kirop ma dinimel, agil, minim sid tikil agak
(*Mat 16:5-12*)

¹⁴Pen bi ne okok saköl gil, bred koñai mer, magil nokim alap nep di ñig magöb ar ak lil, dad amnilak. ¹⁵Nab okok amlig gi, Jisas kirop agak, “Perisi yis kiri ak abe, Herod yis ne ak abe, niñ tep ginimib,” agak.

¹⁶Nib agek, bi ne okok kiri ke ag niñ ag niñ gil aglak, “Bred magil ognap sek ma dopin rek ageb,” aglak. ¹⁷Jisas pen kiri aglak nibak ke niñil agak, “Tari ginig bred magil ma dopin, agil, agebim? Nibi minim niñil, wagin ak ma nipim ar? ¹⁸Udin lak ak ma nipim? Timid lak ak ma nipim?

Aka niñil saköl gipim? ¹⁹Bi paip tausan midelak ñin ak, bred magil akniñ mamid alaŋ ti paŋ gi ñen, ñibil dai dai yepil yepil gilak okok, wad titi gi rek yipek?” agak. Agek aglak, “Wad akniñ umigan alaŋ yignok,” aglak. ²⁰Ñib agelak agak, “Pen bi po tausan midelak ñin ak, bred magil akniñ ar oñid ak ti paŋ gi ñen, ñibil dai dai yepil yepil gilak okok, wad titi gi rek yipek?” agak. Agek aglak, “Wad akniñ ar oñid ak yignok,” aglak. ²¹Agelak agak, “Ñibi minim niñil, wagin ak ma nipim ar?” agak.

Udin kwoi gak bi alap Jisas gek, udin ñil niñak

²²Pen kiri Betsaida taun amjakel niñlig gi, bin bi ognap bi udin kwoi gak alap dapil, Jisas nop neb neb gil aglak, “Nop di niñan,” aglak. ²³Agelak, Jisas bi udin kwoi niñak nop ñinmagil kid ak dil, poŋ dil karip tiriŋ tiroŋ gol siñak amiñ, udin nop ak kiñik ñagil, nop di niñil, agak, “Udin nak tap ognap niñeban aka?” agak. ²⁴Agek agak, “Yau. Bin bi okok niñebin ak, pen mab bid rek okok gi tagebal,” agak. ²⁵Agek, Jisas kauyaŋ udin magil nop di niñek, dai komiñ lek tap okok magilsek niñ tep yib gak. ²⁶Pen Jisas bi niñak nop agak, “Kauyaŋ adik gi karip tiriŋ tiroŋ bin bi midebal kidadaŋ ma amnimin; karip nak yipid gil amnoŋ,” agak.

Pita Jisas nop agak, “Nak nep me Mesaia ak,” agak
(*Mat 16:13-20; Luk 9:18-21*)

²⁷Jisas bi ne okok eip karip tiriŋ tiroŋ taun kib Sisaria Pilipai maŋ siñak amnilak. Kanib nab siñak amlig gi kirop agak, “Bin bi okok, yip bi an agil niñebal?” agak. ²⁸Agek aglak, “Bin bi ognap nep Jon bi ñig pak ñeb ak, agebal; ognap Ilaija, agebal; ognap bi God minim agep ke nib alap, agebal,” aglak. ²⁹Agelak, Jisas kirop agak, “Ñibi ke pen yip bi an, agil, nipim?” agak. Agek, Pita agak, “Nak nep me Mesaia ak,” agak. ³⁰Agek, Jisas agak, “Ñibi bin bi ognap kirop minim niñak ma ag ñinimib,” agak.

Jisas agak, “Yad kimil kauyaŋ warikniŋain,” agak
(*Mat 16:21-28; Luk 9:22-27*)

³¹Jisas pen wagin gil bi ne okok kirop minim ag ñilig gi agak, “Bi Ñi ne yur kib yib dinigab. Bi kib minim tig bilokep okok abe, bi God nop tap sobok gep bi kib okok abe, bi lo minim ag ñeb okok abe, nop niñel, milik yapek, ñag pak lel, ne kimil, ñin omal midil, ñin omal nokim ak kauyaŋ warikniŋab,” agak. ³²Jisas minim niñak miserj agek, Pita niñek, tep ma gek, Jisas nop dam gol siñak amiñ, nop ag gilig gi agak, “Minim niñak rek ma agan,” agak. ³³Pen Jisas adik gil, bi ne okok kirop niñil, Pita nop agak, “Seten! Nak kid yad okok amnoŋ! God gos ñeb rek ma ageban; bin bi okok gos nipal rek nep niñil ageban,” agak.

³⁴Nib agil, bi ne okok abe, bin bi konjai nep midelak okok abe, sik agek, wagin sijak apelak agak, “Bin bi an an yad eip midenimel okok, tap tari lim dai ar wagin aul gos kib nipal ak kirig gil, mib goŋ kiri ke gos kib nipal ak kirig gil, mab kros di ka gil yip kisen ginimel. ³⁵Bin bi, Jisas nop niŋ di midon, tep ma ginigab agil niŋnigal bin bi okok, pis nep ap yap paknigal. Pen bin bi, Jisas nop niŋ dil, minim tep ne niŋ di midon, cinop gi timel genigal ak, minim ma mideb agil gel amnigab bin bi okok, God gek per nep per nep komiŋ midenigal.

³⁶“Pen bin bi, tap tep lim dai ar wagin aul konjai nep din, ag gos nipal bin bi okok, karip lim wagin aul mideb tap okok magilsek dinigal ak pen komiŋ per midep won ak ma dinigal. ³⁷Tap tep okok magilsek dam sikim gil, komiŋ per midep won ak taunimel rek ma lip.

³⁸“Miŋi ŋin nibaul bin bi kiri bin si bi si gil, tap si tap timel gilig gi midebal ak, bin bi an, yip abe minim yad abe nabiŋ ginigab, kisen Bi ŋi ne Nap melik tep aknib ke dil, ejol siŋ okok sek apenigab ŋin ak, ne bi nibak nop ak rek nep nabiŋ gek, ‘Nop ma nipin,’ agnigab,” agak.

9 ¹Pen Jisas nib agil, minim alap agak, “Yad nibep minim niŋid agebin, nibi bin bi midebim siŋ aul ognap komiŋ midem niŋlig gi, God bin bi dil kod midenigab ŋin ak, kilis kib sek apek niŋnigabim,” agak.

Jisas mib goŋ ne ak ke yib lak

(Mat 17:1-12; Luk 9:28-36)

²Pen kisen ŋin aknib kagol oŋid ak midil, Jisas ne Pita Jems Jon kirop yakam poŋ dil, karip lim bin bi ma midelak dim yirik alaŋ alap kilan gi amnilak. Amil, Jisas nop niŋel niŋlig gi, mib goŋ ne ak ke yib lak. ³Walij ne ak tid tep ke yib lil, mimelik yib gak. Pen bin bi lim dai ar wagin aul alap walij ognap ŋig lil ulik malik gel, tid nibak rek linimiŋ rek ma lip. ⁴Pen magil nibak niŋlak, Ilaija eip Mosis eip apil Jisas eip minim ag miderek. ⁵Kiri niŋil, Pita Jisas nop agak, “Minim ag ŋeb bi, cin tep yib apil siŋaul midobin! Nib ak, cin karip badak bad omal nokim gin; nep alap, Mosis nop alap, Ilaija nop alap,” agak. ⁶Kiri pirikelak rek me, Pita gos niŋ tep gil mer, abramek nib agak.

⁷Pen kimi bad alap apil, kirop di yipil yokek niŋlig gi, minim alap kimi nab nib sijak agak, “Alek ŋi midmagil yad yib. Minim agnigab rek niŋim,” agak. ⁸Nib agek niŋlig gi, kiri niŋ padiklig gi niŋlak, bi nib omal ma miderek; Jisas nep midek.

⁹Pen kiri dim alaŋ kirig gil, mak eyaŋ ap yaplig gi, Jisas agak, “Dim aul aposin tap gosip niŋesim ak, miŋi bin bi ognap kirop ma ag ŋinimib. Kisen Bi ŋi ne kimil wariknigab ŋin ak nep misen ag ŋinimib,” agak.

¹⁰Agek, bi ne okok bin bi ognap kirop ma ag ŋilak; kiri ke nep ag niŋ ag niŋ gil aglak, “Kimiŋ wariknigain, agip ak, minim wagin ak tari?” aglak.

¹¹ Nib agil, Jisas nop ag niñil aglak, “Bi lo minim ag ñeb bi okok tari ginig apal, ‘Iaija ned onigab,’ apal?” aglak. ¹² Agelak, Jisas agak, “Niñid apal. God Minim ak ñu kil tikil aglak, ‘Iaija ned apil tap okok gi jin ginigab,’ aglak. Pen God Minim ak minim alap ñu kil tikil aglak, ‘Bin bi okok Bi Ñi ne nop kid ñil, nop yur kib ñinigal,’ aglak minim ak, tari ginig nig aglak, agil nipim? ¹³ Pen Iaija aglak nibak, kisen onigab, agil, gos ak ma niñnimib. Ne bir owak niñil gos kiri ke niñil nop abramek gi timel yib gilak. Nib ak, God Minim ak ñu kil tikil, nop ginigal, aglak rek nep gilak,” agak.

Kijeki ñi sikol alap abañ ñagak ak, Jisas ag mis yokak
(*Mat 17:14-21; Luk 9:37-43*)

¹⁴ Pen kiri ban eyañ amil niñlak, bi lo minim ag ñeb bi ognap, Jisas bi ne akniñ ajip okok eip pen pen ag midel niñlig gi, bin bi koñai nep apil, kirop piñil kos kos gi midelak. ¹⁵ Nig gi niñ midel niñlig gi, Jisas apjakek, bin bi ap midelak okok nop niñil, wal agil, amil nop ag wasu dilak.

¹⁶ Jisas bi ne okok kirop ag niñil agak, “Tari ginig pen agek pen agek gesim?” agak. ¹⁷ Nib agek niñlig gi, bi alap bin bi midelak nab nib siñak agak, “Minim ag ñeb bi. Ñi yad ak, kijeki abañ ñagek, minim ma geb. ¹⁸ Ñin ognap nop tapin gek, ap yap pakil, kiñik kobkob kosib masib apil, meg sip yimil, ñinmagil tob mib goñ yin gil gip. Per nig gek gek me, dopin ak pen bi nak okok kirop agen, kijeki ak ag yok mer niñil kirig gipal,” agak.

¹⁹ Nib agek, Jisas kirop agak, “Nibi bin bi miñi midebin aul God nop niñ di kilis ma gipim. Minek akal nop niñ dil, tap nib okok ke ginigabim? Minim per agen nipim ak, titi gil minim kil sek alap agen niñnigabim? Ñi nibak dad midebin aul dowim!” agak. ²⁰ Agek, dam Jisas midek wagin siñak dapel, kijeki ñi nibak nop abañ ñagak ak, Jisas nop niñil, ñi ak nop gek, ap yap pakil, adik madik gilig gi, kiñik kobkob kosib masib apil yowak. ²¹ Nig gek, Jisas ñi nibak nap nop ag niñil agak, “Tap nibak ñin akal rek gak?” agak. Agek agak, “Birarik nep ñi sikol won ak nep gak. ²² Kijeki nibak, nop per ñag pak lin, agil, mab yineb nab okok abe, ñig nab okok abe di yokeb. Nib ak, cirop apil yimig niñil, tap nibak ag yokep rek lonimij ak, ag yokan,” agak. ²³ Agek, Jisas agak, “Yip tari ginig, ‘Ag yokep rek lonimij ak, ag yokan,’ agil ageban? Ag niñnigain rek ginigab, ag gos niñnigan ak, ag niñnigan ak rek ginigab,” agak. ²⁴ Agek, ñi nap ak kasek nep agak, “Nep niñ debin; nig ginigan, agil, gos ak niñebin ak pen gos omal niñnim rek lip ak, yip gos tep ñek niñil yad pis nep niñ dinim,” agak.

²⁵ Pen bin bi koñai nep, apil mal Jisas eip midelak siñak, pig gi rikid ag apelak niñlig gi, Jisas kijeki ak nop agak, “Nak kijeki, bin bi gek timid saköl ñagek minim ma apal ak, nep agebin, ñi piyak nop kirig gil, pis nep

amil, kisen kauyaŋ ma adik gi onimin!” agak. ²⁶Agek, kijeki nibak gaul kib gil, sön amniŋ gil, ñi ak nop gek, ap yap pakil, jep jep di wös gek, bin bi koŋai nep aglak, “Bir kimib,” aglak. ²⁷Nib aglak ak pen Jisas ñinmagil kid ne ak dil, nop di warik ñek, warik komiŋ midek. ²⁸Kisen Jisas kariŋ ñilik miŋan eyaŋ amil, bi ne okok eip kiri nep midliŋ gi, nop aglak, “Tari giŋiŋ cin kijeki nibak nop ag yok mer niŋin?” aglak. ²⁹Agelak, Jisas agak, “Kijeki nibak rek yokop ma ag yokniŋal; God nop sobok gel me, mis amniŋal. Mer ak, mis ma amniŋal,” agak.

Jisas kauyaŋ, “Kimil warikniŋain,” agak
(*Mat 17:22-23; Luk 9:43-45*)

³⁰⁻³¹Jisas bi ne okok poŋ dil, kariŋ lim nibak kirig gil, kariŋ lim Galili nab siŋak amlig gi, bi yad okok kirop minim ag ñi tep giŋim, agil, kapkap we gil midliŋ gi, kirop ag ñoliŋip. Kirop ag ñil agak, “Bi Ñi ne nop mimig gil bi ognap kirop ñek, nop ñag pak lel, kimil, ñin omal midil, ñin omal nokim ak kauyaŋ warikniŋab,” agak. ³²Ne nib agek niŋliŋ gi, minim wagiŋ nibak tari, agil, nop ag niŋlap ak pen pirikil, ma ag niŋlak.

Yad nep bi kib midebin, agil, minim pen pen aglak
(*Mat 18:1-5; Luk 9:46-48*)

³³⁻³⁴Pen kanib nab siŋak amlig gi, Jisas bi ne okok, “Yad nep bi kib, nak bi kib mer,” aqliŋ gi, pen pen agel amnak. Amil Kapaneam amjakil, kariŋ miŋan eyaŋ ak amil, Jisas kirop ag niŋil, agak, “Kanib nab siŋak aplig gi, minim tari agem aposip?” agak. Agek, bi ne okok minim nibak ag niŋliŋ gi apelak ak niŋil, nabiŋ gek, pen ma ag ñilak. ³⁵Ma ag ñelak, Jisas am bisig gil, bi ne akniŋ umigan alaŋ okok kirop agek apelak agak, “Bin bi pobiŋ midenimel okok, bin bi yokop wög gi ñibal rek midil, bin bi ognap kirop magilsek wög gi ñinimel,” agak. ³⁶Nib agil, ñi pai sikol alap dapiŋ midelak nab siŋak lil, kaig giŋiŋ gi, agak, ³⁷“Bin bi yip niŋ dil, ñi pai sikol aul rek nokim alap di tep giŋiŋal ak, ñi ak nop nep mer, yip abe diŋiŋal. Pen yip diŋiŋal ak, yip nep mer, Bapi yip ag yokek onek ak nop abe diŋiŋal,” agak.

Bin bi kausal maual cin ma giŋiŋal okok, kiri bin bi niŋeb cin
(*Luk 9:49-50*)

³⁸Pen Jon Jisas nop agak, “Minim ag ñeb bi. Bi alap yib nep agil, kijeki kiyob ñilik ag sön ag yokek, cin niŋil nop agnok, ‘Nak bi cin eip jim ñil ma tageban ak, nig ma giŋimin,’ agnok,” agak. ³⁹Agek, Jisas nop pen agak, “Nop tari giŋiŋ mer apek? Bin bi yip gos niŋil, yib yad agil, tap ma gep rek ognap giŋiŋal okok, kisen adik gil yip minim timel ma agniŋal. ⁴⁰Bin bi kausal maual cin ma giŋiŋal okok, kiri bin bi niŋeb cin. ⁴¹Pen niŋim! Bin bi an an, nibep Jisas bi ne, agil, ñig mil ñel ñiŋniŋabim ak, God kirop di tep giŋiŋab,” agak.

Gi timel gijn rek lip, agil, niņ tep ginimib

(Mat 18:6-9; Luk 17:1-2)

42 “Pen bin bi ognap apil, ñi pai yip niņ debal okok, kirop tap si tap timel ar ak gi yomel, kiri gos yip ak saköl gil, tap si tap timel ginigal. Bin bi nig ginig genigal ak, ned kab kib alap kiņam ak nag di li tibikil, dam ñig solwara nab siņak yokplap ak tep. Pen komiņ midil, nig gi timel ginigal ak, yur kib yib dinigal,” agak.

43 Jisas nib agil agak, “Ñinmagil alap gek, nibi tap si tap timel ginig gebim ak, ñinmagil pis kid nib ak tib gi rik gi yokem, pis kid ak nep midonimiņ. Nig gil, tap si tap timel nibak ma ginigabim rek, komiņ amniğabim. Pen ñinmagil omalgil midek, gi timel gil, karip lim Hel, mab per nep yin mideb siņak amniğabim. 44 Karip lim nibak,

‘kirop kisoı per nep li midlig gi,
mab yin nep midenigab.’

45 “Tob kid ak, ak rek nep. Tob kid alap gek, nibi tap si tap timel ginig gebim ak, tob kid pis nibak tib gi rik gi yokem, pis kid ak nep midonimiņ. Nig gil, tap si tap timel nibak ma ginigabim rek, komiņ amniğabim. Pen tob omalgil midek, gi timel gem, nibep karip lim Hel, mab ke yineb ak yokek, yur kib dinigabim. 46 Karip lim nibak,

‘kirop kisoı per nep li midlig gi,
mab yin nep midenigab.’

47 Udin magil ak, ak rek nep. Udin magil alap gek, nibi tap si tap timel ginig gebim ak, udin magil pis nib kid ak tig gilig gi yokem, pis kid ak nep midonimiņ. Nig gil, tap si tap timel nibak ma ginigabim rek, God karip lim ne siņak amniğabim. Pen udin magil omalgil midek, gi timel gem, nibep karip lim Hel, mab ke yineb ak yokek, yur kib dinigabim. 48 Karip lim nibak,

‘kirop kisoı per nep li midlig gi,
mab yin nep midenigab.’

49 “Gam wak nawöj mab dagilel yin dek tep liniğab ak rek, God ne bin bi magilsek kirop nig aknib rek nep ginigab.

50 “Dek sol tap dek kal tep yib ak pen dek kal ne ak amek, titi gil gem, kauyaņ dek kal ginigab? Nib ak, nibi bin bi dek kal rek midil, bin bi ognap midmagil lil eip kapkap midenimib,” agak.

“Bin ag yokep aka mer?” aglak

(Mat 19:1-12; Luk 16:18)

10 ¹ Jisas Kapaneam kirig gil, karip lim Judia nab okok amil, am ñig Jodan juil, pis kid adaņ amnak. Bin bi okok niņil, ap mogim gelak niņil ne per goligip rek kirop minim ag ñak.

² Bi Perisi ognap, Jisas tari rek agniğab, agil, apil, nop ag niņil aglak, “Lo minim tari rek mideb? Bi okok bin dil, ag yokniğ, ag yokniğal aka?”

aglak. ³Agelak, Jisas pen agak, “Mosis God Minim ñu kil tikil, nibep minim tari agak?” agak. ⁴Agek aglak, “Mosis agak, ‘Bin ag yoknig, “Nep ag yokebin,” agil, mij bad alap ñu kil tikil nop ñil, ag yoknimiñ,’ agak,” aglak. ⁵Agelak, Jisas agak, “Niñid agebim ak pen wôs rek God ne bi nig ginigal agil ma gos niñak. Mosis nibep God minim ag ñek, nibi kasek ma dipim ak me, ne lo minim nibak ñu kil tikak. ⁶Pen God karip lim birarik ped okok gi lak ñin ak, bi gi lil, bin gi lil, gak. ⁷Ar nibak me, bi okok nonim nap sikop eip midil, amil bin dil, kirop kirig gil, ⁸kiri ber mal jim ñil kiner niñlig gi, mib goñ nokim linigab. Kisen ke ke mer, jim ñil nep midenigair. ⁹God agek, bi bin dil mib goñ par nokim linigab nibak, bi ognap amil kirop ag pak asik ke ke ma linimel,” agak.

¹⁰Nib agil, bi ne okok eip kauyañ karip ñilik migan eyañ amil, Jisas nop minim ar nibak kauyañ ag niñelak. ¹¹Jisas agak, “Bi alap bin dil, ag yokil, amil bin kisen nib alap dinigab ak, God udin yirik ne siñak ne bin si dep bi. ¹²Bin ak, ak rek nep, bi dil, kirig gil, amil bi kisen nib dinigab ak, ne bi si dep bin,” agak.

Jisas ñi pai sikol okok kirop di kaig gil, ñinmagil ne nabic kirop ar alañ lak

(Mat 19:13-15; Luk 18:15-17)

¹³Bin bi ognap, Jisas ñi pai cin okok di niñañ, agil, dapelak, pen bi ne okok kirop ag gelak. ¹⁴Nib agelak, Jisas niñek, milik yapek, agak, “Ñi pai sikol okok kirig gem, yip olañ. God karip lim ak ñi pai sikol nib okok rek midebal. ¹⁵Yad nibep niñid yib agebin, bin bi okok, ñi pai sikol okok God karip lim ar alañ minim ak niñ dipal rek ma niñ dinigal ak, God karip lim ne siñak ma amnigal,” agak. ¹⁶Nib agil, ñi pai sikol okok kirop di kaig gil, ñinmagil ne nabic kirop ar alañ lil agak, “God nibep kod midonimiñ,” agak.

Bi tap koñai midek alap

(Mat 19:16-22; Luk 18:18-23)

¹⁷Pen Jisas amek niñlig gi, bi alap pig gi rikid ag apil, Jisas midek wagin siñak kogim yimil, agak, “Minim ag ñeb bi tep! Yad tari gil per midep ak dinigain?” agak. ¹⁸Agek, Jisas agak, “Yip tari ginig, ‘Bi tep,’ ageban? Bin bi alap tep ma midebal; God nokim me tep mideb. ¹⁹Pen nak God lo minim ak niñan: ‘Cip ma ñagnimib; bin si bi si ma ginimib; tap si ma dinimib; minim kib agil tom ma agnimib; minim tom agil bin bi ognap tap kirop okok ma pili gi dinimib; nanim nap agnimir ar ak (rek nep) niñil, kisen ginimib,’ ” agak.

²⁰Jisas nib agek, bi nibak Jisas nop agak, “Minim ag ñeb bi. Yad kapan apic nep midil, lo minim nib okok magilsek niñlig gi midebin,” agak.

²¹Agek, Jisas nop niñil, midmagil lil, agak, “Nak tap nokim alap nep ma

gipan. Nak amil, tap nak tari tari mideb okok magilsek sikim gil, mani dil, bin bi tap ma mideb okok kirop ninimin. Nig gil me, tap tep nak ak midenigab God karip lim seb kab ar alaŋ siŋak. Apin rek gil, apil, yad eip tagor,” agak. ²²Nib agek, bi nibak tap ne koŋai midek rek, cib gek, gos par yib lilig gi amnak. ²³Jisas bi ne okok kirop niŋ padiklig gi agak, “Bin bi tap koŋai midenigab okok koslam yib God bin bi ne midel, kirop dil karip ne siŋak kod midenigab,” agak. ²⁴Nib agek, bi ne okok minim nibak niŋil, gos par nep niŋel niŋlig gi, Jisas kirop kauyaŋ agak, “Ni pai yad siŋ aul, minim agebin aul niŋim. God karip lim ak koslam ameb rek mideb! ²⁵Kaj kamel okok nu mauöl nag yokpal migan ak amnig, amnigal ak pen bin bi kilnok kibap mani tap okok koŋai mideb okok, God karip lim ne siŋak koslam yib amnigal,” agak.

²⁶Jisas nib agek, bi ne okok wal yib agil, pen ag niŋek pen ag niŋek gil aglak, “Nib ak, bi an rek komiŋ per midep won ak dinimiŋ?” aglak. ²⁷Agelak, Jisas kirop niŋlig gi agak, “Bin bi okok kiri ke ginimel rek ma lip; God nep me tari tari ginig, ginimiŋ rek nep mideb,” agak. ²⁸Pen Pita Jisas nop agak, “Niŋan! Cin nak eip taglig gi, tap cin okok magilsek kirig gipin,” agak.

²⁹Agek, Jisas agak, “Yad nibep niŋid yib agebin, bin bi yip gos niŋil, minim tep yad wög ak ginig, karip lim kiri kirig gil aka, ninai nimam kiri okok kirig gil aka, nonim kiri okok kirig gil aka, ni pai kiri okok kirig gil aka, wög dai kiri okok kirig gil, wög yip genigal ak, ³⁰God kirop di rep ginigab. Kirop kod midek, lim dai ar wagin aul midenigal nin ak, karip, ninai nimam, nonim, ni pai, wög dai kiri koŋai yib midenigab. Pen nin ognap bin bi ognap okok, kiri bin bi yad eip midebal ak niŋil, kirop gi timel ginigal. Kisen pen God kirop dam karip lim ne siŋak dad amek, ne eip per nep midenigal. ³¹Pen bin bi miŋi ned amebal okok, kisen koŋai nep kid ken yib okok midenigal. Pen bin bi miŋi kid ken yib okok midebal okok, kisen koŋai nep ned am midenigal,” agak.

Jisas kauyaŋ, “Kimil wariknigain,” agak

(Mat 20:17-19; Luk 18:31-34)

³²Pen kiri Jerusalem amlig gi, Jisas ned gak; bi ne okok kisen gil, gos par par niŋlig gi amelak niŋlig gi, bin bi kisen apelak okok niŋil piriklak. Jisas pen bi ne aknib umigan alaŋ okok kirop nep poŋ dil, gol siŋak amil, tap tari nop ginig gak ak kauyaŋ kirop ag nak. ³³Jisas agak, “Cin Jerusalem amon niŋlig gi, bi alap Bi Ni ne nop kain gi dam, bi God nop tap sobok gep bi kib okok abe, bi lo minim ag neb bi okok abe, ninmagil kirop nek, nop minim kib agil, ‘Bi nibaul nop nag pak lep,’ agil, di bi Juda mer okok kirop ninigal. ³⁴Nel, nop ag juil, kiŋik nagil, nag di pakil, dam pis nep nag pak lel kimnigab. Pen nin omal midil, nin omal nokim ak kauyaŋ wariknigab,” agak.

Jems eip Jon eip bi kib midor, ag gos ak niņrek
(*Mat 20:20-28*)

³⁵Sebedi ñi ne omal, Jems eip Jon eip apil Jisas nop agrek, “Minim ag ñeb bi, cir mal nep minim alap ag niņor, nak yau agil ginigan ak tep,” agrek. ³⁶Nib agerek, Jisas kirop agak, “Niri yip ag niņnig gebir nibak, yad nirep tari ginim?” agak. ³⁷Agek agrek, “Kisen nak melik tep ke sek midil, karip lim magilsek kiņ rek kod midenigan ñin ak, cirop mal, bi alap di ñinmagil yipid pis kid nak ar lil, bi alap di ñinmagil aņidken pis kid nak ar lek, bisig midojir,” agrek. ³⁸Nib ager, Jisas agak, “Niri mal niņ rep gil ma agebir. Ñig silek yad ñiņnigain ak niri mal ak rek nep ñiņnigair? Yad ñig paknigain ak, niri mal ak rek nep paknigair?” agak. ³⁹Agek, “Yau, nig ginigabir,” agrek. Agerek, Jisas agak, “Niņid agebir. Ñig yad ñiņnigain ak, niri mal ak rek nep ñiņnigair; ñig paknigain ak, niri mal ak rek nep paknigair ak pen ⁴⁰ñinmagil yipid ken pis kid yad bi an midenigab, ñinmagil aņidken pis kid yad bi an midenigab ak yad ma agnigain; ak Biñen tap ne; ne ke niņip rek ginigab,” agak.

⁴¹Pen Jisas bi ne aknib wajrem alañ minim nibak niņel, kirop milik yapek, Jems Jon bi omal kirop ag gilak. ⁴²Nig gel, Jisas kirop magilsek agek apelak agak, “Ñibi niņim, Juda bin bi mer okok, kiņ kiri kilis gil kod midebal; bi kib kiri minim tari tari agnigal ak niņil kaunan dil kisen ginigal me. ⁴³Pen kiri gebal rek ma ginimib. Bi an bi kib midonimiņ ak, bi sikol rek midil, bin bi ognap kirop wög gi ñeb bi rek midonimiņ. ⁴⁴Bi an bi kib yib midonimiņ ak, bi sikol tam okok rek midil, bin bi ognap kirop magilsek miñ wög gep bi alap rek midonimiņ. ⁴⁵Bi Ñi ne ak, bin bi okok kiri wög yip gilaņ, agil, ma owip; wög kirop gi ñi damil, kisen tap si tap timel gipal ar ak saj gi kimen, bin bi koņai nep komiņ amnilaņ, agil, owip,” agak.

Jisas uđin kwoi gak bi alap gek, uđin ñil niņak
(*Mat 20:29-34; Luk 18:35-43*)

⁴⁶Jisas bi ne okok eip taun kib Jeriko amjaklak. Kiri Jeriko kirig amniğ, bin bi koņai yib nep eip amnilak. Bi Timeas ñi ne Batimeas uđin kwoi gak ak, mani ñim, agil, asib aglig gi, kanib gol siņak bisig midek. ⁴⁷Bisig midek niņlig gi, “Jisas bi Nasaret nib ak apeb,” agel niņil, ne sik agil agak, “Jisas, Depid Ñi ne, yip yimig niņan!” agak.

⁴⁸Agek, bin bi okok nop silikil aglak, “Minim ma agan! Kapkap midei!” aglak. Nib aglak ak pen ne kapkap midil mer, meg miğan dap ranil sik kib agil agak, “Depid Ñi ne, yip yimig niņan!” agak. ⁴⁹Agek, Jisas maņ nib siņak wös gil agak, “Nop sik agem, siņaul owaņ,” agak. Agek, bin bi okok bi uđin kwoi ak nop aglak, “Jisas nep sik ageb. Warikil gos sek owan,” aglak. ⁵⁰Agelak, walij parsek ne ak tig ju yokil, kasek nep

warikil, Jisas midek sijak amnak. ⁵¹Amek, Jisas nop agak, “Yip tari gan, agil, apeban?” agak. Agek bi udin kwoi gak ak agak, “Minim ag ñeb bi. Udin ak kauyan ñil niñin, agil, apebin,” agak. ⁵²Agek, Jisas agak, “Jisas yip gek komiñ linigab, agil, niñ dipan ak rek, me nep komiñ lip, bir nak amnoñ,” agak. Nib agek niñlig gi, won nibak nep udin ñil niñil Jisas eip amnak.

Jisas Jerusalem kiñ rek amnak

(*Mat 21:1-11; Luk 19:28-40; Jon 12:12-19*)

11 ¹Jisas bi ne okok eip amil amil Jerusalem ulep ulep gilig gi, Olip Dim, karip tiring tiroñ Betpagi Betani amjakil, Jisas bi ne omal agil agak, ²“Karip lim migan kidadañ amil niñnigair, kaj donki marip bin bi dad ma tapal alap ñon gi lel midenigab. Niñil, wisib donimir. ³Bin bi ognap nirep tari ginig nig gebir, agenimel, agnimir, ‘Bi Kib wög alap gil, kauyan yokek, onigab,’ agnimir,” agak. ⁴Nib agek, amil niñrek, kaj donki marip alap kanib sijak karip kijon wagin gol sijak nag ñon gi lel midek. Miñ wisiber niñlig gi, ⁵bin bi yokop ulep nib sijak midelak okok aglak, “Tari ginig kaj donki marip nibak miñ wisibebir?” aglak. ⁶Agelak, Jisas agak rek nep agerek, yau agel, ⁷kaj donki marip nibak dam Jisas midek sijak apil, walij par kib kiri tig juil, kaj donki ar alañ lirek, Jisas ar nibak bisigil amnak. ⁸Bin bi okok koñai nep, walij parsek kiri okok tig juil, kanib kib ar sijak lilak; ognap mab kas okok tib rik dap lilak. ⁹Nig gil, bin bi nop ned gilak okok abe, nop kisen gilak okok abe, sik aglied gi aglak,

“God yib ne agon ar amnañ!

Bi Kib bi ne ag yokek apeb aul;

God nop kod mid tep ginimiñ.

¹⁰Based Depid kiñ midil, bin bi kod midoligip rek,
ne cinop ak rek nep kod midenigab!

God yib ne agon ar amnañ!” aglak.

¹¹Jisas nig gil, Jerusalem amil, God sobok gep karip migan ak amil, tap okok niñ tagek niñlig gi, piñ pañid amek niñlig gi, bi ne aknib umigan alañ okok eip karip tiring tiroñ Betani amnilak.

Mab ñiñeb alap magil ma pilak

(*Mat 21:18-19*)

¹²Minek pen, Betani nib adik gil kanib nab sijak aplig gi, Jisas nop yuan lak. ¹³Yuan lek, par yipid niñak mab uñem alap midek. Magil ognap pilil mideb aka agil, amil niñak, magil ma pilak; mab kas nep midek. Pen tari: magil pilep ñin ak ma owak. ¹⁴Nig gek, Jisas mab nibak agak, “Kisen bin bi ognap mab magil nak ak ma ñiñnigal,” agak. Bi ne okok minim agak nibak niñlak.

God sobok gep karip tap sikim gelak okok, Jisas kirop yik sön yokak
(*Mat 21:12-17; Luk 19:45-48; Jon 2:13-22*)

¹⁵Jisas bi ne okok poŋ dil, Jerusalem amil, God sobok gep karip migan amil niŋak, bin bi okok sikim gilig gi, mani yimjiklig gi midelak. Niŋ gelak, mani yimjik gelak abaŋ bad okok tig adik gil, yakir dap lel taulig gi midelak mab bog okok tig adik gil, bin bi sikim gilig gi, tap taulig gi, karip migan nibak midelak okok, kirop yik gi mis yokak. ¹⁶Yik gi mis yokil agak, “Tap ognap dap God sobok gep karip kab wari kis kis gil mideb nab aul ma padiknimib,” agak. ¹⁷Nib agil agak, “God Minim ak ñu kil tikil aglak, ‘God agip, ‘Karip yad ak, bin bi karip lim tigoŋ tigoŋ magilsek apil, yip sobok ginigal,’ agip,’ aglak. Pen nibi niŋ gesim, bi tap si di we gil midebal karip alap rek lip,” agak.

¹⁸Nib agek, bi God nop tap sobok gep bi kib okok abe, bi lo minim ag ñeb bi okok abe, minim nibak niŋil, nop ñag pak lin, aglak. Pen bin bi okok magilsek minim nop ak niŋil wal aglak rek me, Jisas nop pirikil, titi gil nop ñag pak lin, agil, gos ak piyo niŋ midelak. ¹⁹Kislim gak magil ak, Jisas bi ne okok eip Jerusalem kirig gil amnilak.

God nop gos nokim niŋil ag niŋem, ag niŋnigabim rek ginigab
(*Mat 21:20-22*)

²⁰Minsek kislim sek kanib nab siŋak kauyaŋ amlig gi niŋlak, mab uŋem Jisas ag gak ak wagin sek pis nep milep gil midek. ²¹Niŋ gek niŋlig gi Pita agak, “Minim ag ñeb bi, niŋan! Mab uŋem tol ag genak aul milep gi yowip!” agak. ²²Agek, Jisas agak, “God nop niŋ dinimib. ²³Yad nibep niŋid agebin, cin agon God ak rek nep ginimiŋ, agil, gos omal mer, gos nokim niŋil, dim gol nibaul ‘Niŋ solwara nab siŋak adaŋ gi dam pakan,’ agenigabim ak, agnigabim rek ginigab. ²⁴Nib ak me, God nop ag niŋnigabin rek ginigab, agil, gos nokim niŋil ag niŋem, ag niŋnigabim rek ginigab. ²⁵Pen God nop sobok ginig gebim ak, bin bi ognap nibep gi timel gipal okok niŋil kirig ginimib, niŋil Nap nibi seb kab ar alaŋ mideb ak, tap si tap timel nibi gipim okok niŋil kirig ginigab. ²⁶Pen bin bi ognap nibep gi timel gipal okok niŋil ma kirig ginigabim ak, Nap nibi seb kab ar alaŋ mideb ak, tap si tap timel nibi gipim okok ak rek nep niŋil ma kirig ginigab.

“Nep bi an agek niŋ gi ajeban?” aglak
(*Mat 21:23-27; Luk 20:1-8*)

²⁷Pen Jisas bi ne okok eip kauyaŋ Jerusalem apjakil, ne God sobok gep karip migan okok gi tagek niŋlig gi, bi God nop tap sobok gep bi kib okok abe, bi lo minim ag ñeb okok abe, bi minim tig bילוkep okok abe, Jisas midek siŋak apil aglak, ²⁸“Nep bi an, niŋ ginimin, agek, niŋ gilig

gi ajeban?” aglak. ²⁹Agelak, Jisas pen agak, “Yad nibep minim alap ag niŋen, yip ag n̄enigabim ak, yad pen yad bi an agek nig gi ajebin ak, nibep ag n̄inigain. ³⁰Jon bin bi okok kirop n̄ig pak n̄ak ak, God agek n̄ig pak n̄ak aka gos ne ke niŋil n̄ig pak n̄ak? Yip agem niŋin!” agak.

³¹Nib agek, kiri ke ag niŋ ag niŋ gil aglak, “Cin agnigabin, ‘God agek, Jon bin bi okok kirop n̄ig pak n̄ak,’ agenigabin ak, cinop agnigab, ‘Nib ak, tari ginig Jon minim nop ak ma niŋ dipim?’ agnigab. ³²Pen cin agnigabin, ‘Jon gos ne ke niŋil kirop n̄ig pak n̄ak,’ agnigabin ak, cinop tari ginigab?” aglak. Pen tari: bin bi okok magilsek, God agek, Jon wög ne gologip ag gos niŋölogipal ak me, Juda bi kib nib okok pirikil minim ke alap ma aglak. ³³Gos nibak niŋil aglak, “Cin ma nipin,” aglak. Nib agelak, Jisas kirop pen agak, “Nibi yip pen ma ag n̄ibim rek, yad bi an agek gi ajebin ak, nibep ak rek nep pen ma ag n̄inigain,” agak.

Juda bin bi okok kiri God bi ne okok kirop gi timel gilak, agak
(*Mat 21:33-46; Luk 20:9-19*)

12 ¹Jisas pen kirop minim ar alap sid tikil agak, “Bi alap wari gil, nag wain wög ak gi yimil, wain magil pak cib jakep, agil, migan alap gi li tep ginigab. Bin bi apil nag magil si dinigal ak niŋ midojin, agil, karip kilan gi par kib alap gil, bi ognap kirop agnigab, ‘Nibi nag wain wög yad ak kod midil, kisen pilil pok gek, yip ognap, nibi ognap dinimib,’ agil, karip lim par okok amnigab. ²Wain magil pok ginigab magil ak, bi ne alap ag yokil, agnigab, ‘Wain magil yip ognap n̄el donimin!’ agnigab. ³Agek, amjakek, bi wög ginigal okok, nop di pak pak lil, yokop nep ag yoknigal. ⁴Nig gel, bi wain wög nap nib ak bi alap pen ag yoknigab. Amjakek, nop nabic alaŋ pakil, gi timel yib ginigal. ⁵Nig gel, bi wain wög nap nib ak, bi alap pen ag yokek amek, nop pis nep n̄ag pak linigal. Bi ognap koŋai nep ag yokek, nib aknib nep gilig gi, ognap tapin magil paknigal, ognap pis nep n̄ag pak linigal. ⁶Nig gel gel me, bi wain wög nap nib ak bi ne alap ma midenigab; n̄i midmagil ne nokim midenigab ak, minim ne ak dinigal, agil, ag yokek amnigab. ⁷Pen amjakek, bin bi wain wög gi midenigal okok niŋil agnigal, ‘Ni apeb aul, bi wain wög nap nib ak n̄i ne apeb. Nib ak, nop n̄ag pak lil me, tap ne dinimij rek okok cin dinigabin,’ agnigal. ⁸Nib agil, n̄i nibak nop pis nep n̄ag pak lil, dam wain wög mis okok di yoknigal. ⁹Nig genigal, bi wain wög nap nib ak apil, tari ginigab? Ne apil, bin bi wain wög genigal nib okok kirop n̄ag pak lil, bin bi ognap kirop agek, wain wög nibak kod midenigal,” agak.

¹⁰Nib agil kirop agak, “Nibi God Minim n̄u kil tiklak dai alap ma nipim rek lip. God Minim dai nibak n̄u kil tikil aglak,

‘Bi karip gep okok kab par kirig gilak ak,
kab nibak nep miŋi karip sap nab eyaŋ siŋak piŋil n̄il mideb.

¹¹ Bi Kib nig gak ak,
cin niñil tep agobin,' aglak," agak.

¹² Jisas nib agek, bi God nop tap sobok gep bi kib okok abe, bi lo minim ag ñeb okok abe, bi minim tig bilokep okok abe, cinop nep ageb, agil, nop cici din, ag niñlak ak pen bin bi okok kirop pirikil, kirig gilak.

“Takis ñeb aka ma ñeb?” aglak
(*Mat 22:15-22; Luk 20:20-26*)

¹³ Pen kisen Juda bi kib nib okok, bi Perisi ognap eip, Herod bi ne ognap eip kirop aglak, “Nibi Jisas mideb siñak amil, nop minim ognap ag niñem, ne tari ninöl minim agenigab, nop dam miñ linigabin,” aglak. ¹⁴ Nib agelak, Jisas midek siñak amil, aglak, “Minim ag ñeb bi. Cin nipin nak bi niñid yib nep ageban. Bi kib okok abe, bin bi yokop okok abe, kirop niñil ma pirikpan. God ageb rek nep niñil, bin bi okok kirop yipid gil nep ag ñeban. Nib ak, cinop ag ñan! Cin Juda bin bi lo okok titi gil mideb? Gapman bi kib Sisa nop takis ñijin aka ma ñijin?” aglak. ¹⁵ Nib agelak, Jisas minim tom agelak ak niñil agak, “Tari ginig, ninöl minim agañ, agil, yip minim esek nibak agebim? Kab magil alap dapem, yad niñin,” agak. ¹⁶ Agek, kab magil alap dap ñel niñil agak, “Kab magil bak ak, bi an milik dai ak midil, an yib ak mideb?” agak. Agek aglak, “Bi kib Sisa ak nep,” aglak. ¹⁷ Agelak, Jisas agak, “Sisa tap ne midonimiñ ak Sisa nop ñinimib; God tap ne midonimiñ ak God nop ñinimib,” agak. Nib agil, minim tom kiri ak talak gi tep gak nibak niñil, wal yib aglak.

Bin bi kimil wariknigal
(*Mat 22:23-33; Luk 20:27-40*)

¹⁸ Sadyusi bin bi okok, bin bi kimil, ma wariknigal, agil, niñöligipal rek, ognap Jisas midek siñak apil aglak, ¹⁹ “Minim ag ñeb bi. Bi God minim agep Mosis, minim alap cinop ñu kil tikil agak, ‘Bi alap bin dil, ñi pai tikil mer, yokop kimenigab ak, nimam ne alap pen bin kanil nibak dil, mam kimak ak ñi pai ne ak, agil, tiknigab,’ agak. ²⁰ Nib ak, bi wagin sek aknib ar oñid ak midenigal. Nimam ned bin dil, ñi pai tikil mer, yokop kimnigab. ²¹ Kimek, nimam yigwu nab nib ak pen bin nibak nop dil, ak rek nep ñi pai tikil mer, yokop kimnigab. Nig gek, nimam yigwu nokim nib ak pen bin nibak nop dil, ak rek nep ñi pai tikil mer, yokop kimnigab. ²² Nig gi dam dam, nimam aknib ar oñid okok ñi pai tikil mer, magilsek yokop kimnigal. Kisen bin ak, ak rek nep kimnigab. Pen bin bi kimil wariknigal, apan ak, ²³ bin nokim alap bi ne aknib ar oñid linigab nibak, kisen nimam akal bin ne midenigab?” aglak.

²⁴ Agelak, Jisas agak, “Nibi God Minim ñu kil tiklak ak abe, God kilis ne ak abe ma nipim rek, gos niñid ma nipim. ²⁵ Bin bi kimbak okok wariknigal ñin ak, God ejol ne okok midebal rek midil, bi okok bin ma

dinigal; bin okok bi ma dinigal. ²⁶Pen bin bi kauyan ma wariknigal, apim ak, Mosis mab sikol yin nep midek kesim ñu kil tikak ak ma nipim rek lip. God, mab yinek nab sijak midil, Mosis nop agak, ‘Ebrahim, Aisak, Jekop, God kiri me, yad midebin,’ agak. Nib ak, based sikop ned kimlak okok kirop agil, ‘God kiri midebin,’ agak. Pen nibi apim rek, bin bi okok kimil, pis nep kimblap ak, God ne, ‘Ebrahim, Aisak, Jekop, God kiri midebin,’ ma apkop. ²⁷Nibi gos niņ tep ma gil, bin bi kimbak okok niņil, bir pis nep kimbak apim ak pen God niņip kiri komiņ midebal. Bin bi komiņ midebal nib okok ne God kiri mideb,” agak.

God lo minim kib yib ak
(*Mat 22:34-40; Luk 10:25-28*)

²⁸Bi lo minim ag ñeb bi alap, Jisas Sadyusi bin bi okok kirop ag tep gak ak niņil, apil nop ag niņil agak, “Lo ar akal kib yib?” agak. ²⁹Agek, Jisas agak, “Lo kib yib ak, God Minim ak ñu kil tikil aglak, ‘Isrel bin bi niņim! Bi Kib cin God, ne nokim nep Bi Kib mideb. ³⁰Midmagil nak ak magilsek, gos timid nak ak magilsek, kilis nak ak magilsek dil, God Bi Kib nak ak nop midmagil linimin,’ aglak. ³¹Minim kib yib alap, God Minim ak ñu kil tikil aglak, ‘Nak ke midmagil lipan rek, bin bi ke nib okok kirop ak rek nep midmagil linimin,’ aglak. Lo minim okok magilsek, lo nib omal me lo kib yib mideb,” agak. ³²Agek, bi lo minim ag ñeb bi ak pen agak, “Minim ag ñeb bi. Nak niņid yib ageban, God nokim me Bi Kib yib mideb; ne rek ognap ma midebal. ³³Cin God nop tap pak sobok gi ñinigabin aka tap pak sobok gi ñi pis nep dagilnigabin ak tap kib mer. Tap kib yib me, midmagil cin ak magilsek, gos timid cin ak magilsek, kilis cin ak magilsek dil, God Bi Kib ak nop midmagil lijin; cin ke midmagil lipin rek, bin bi okok kirop ak rek nep midmagil lijin,” agak. ³⁴Nib agek, Jisas bi ak, ne gos niņ tep yib gil ageb, agil, nop agak, “Nak God bi ne alap midenimin rek lip,” agak. Jisas pen minim niņid yib okok nep agek ak niņil, bin bi niņ midelak okok pirikil, kisen minim esek okok nib nop neb neb gil ageligipal rek, ognap sek nop ma ag niņlak.

Krais ne bi an?
(*Mat 22:41-46; Luk 20:41-44*)

³⁵Jisas God sobok gep kariņ sijak bin bi okok kirop minim ag ñi midlig gi, bin bi okok kirop agak, “Bi lo minim ag ñeb bi okok tari ginig apal, ‘Krais ak ne Depid ñi ne nep,’ apal? ³⁶Kaun Siņ ak, Depid nop gos ñek, Depid ne ke ñu kil tikil agak,
‘Bi Kib ne Bi Kib yad ak nop agak,
“Nak ñinmagil yipid ken kid yad bisig midenimin me,
yad bin bi kausal maual nak okok
kirop tob mok nep okok linigain,” agak,’ agak.

³⁷Nib ak, Depid ne ke Kraiss nop 'Bi Kib yad' agak. Pen Kraiss Depid ñi ne midobkop, nop 'Bi Kib yad' ma apkop," agak. Jisas minim wagin nibgil niñil ag tep gek rek, bin bi koñai yib midelak okok minim nop ak miñ miñ gilig gi niñlak.

Bi lo minim ag ñeb bi okok gipal rek ma ginimib, agak
(*Mat 23:1-36; Luk 11:37-54; 20:4*)

³⁸Jisas bin bi okok kirop minim ag ñilig gi agak, "Bi lo minim ag ñeb bi okok kirop niñ tep ginimib. Kiri gipal ar ak, walij par kib okok lil, maker okok amon, bin bi okok, apebim e, agel, yib cin i ar alarj miderj, agil, gos ak nipal. ³⁹Pen Juda mogim gep karip ak amon, cinop kau ar tep tep bi kib bisigpal, ar ak bisigim, agnigal, agil, gos ak nipal. Bin bi tap kib ñibal nab ak, ak rek nep, bin bi udin yirik ar siñak bisigon, cinop niñil, cin bi gep bi yib mideb, agnigal, agil, gos ak nipal. ⁴⁰Bi lo minim ag ñeb bi okok, bin kañil karip tap kiri okok tap cin rek larj, agil, pili gi dipal. God nop sobok ginigabin ak, bin bi niñnimel, agil, minim par kib tom tom ar ognap nep okok apal. Niñ gipal ak, kisen God kirop yur kib akñib ke yib ñinigab," agak.

Bin kañil yim gep rek eñap God nop tap kib ñak
(*Luk 21:1-4*)

⁴¹Jisas God sobok gep karip mani dap ñöligipal migan ulep siñak bisig midil niñak, bin bi okok apil mani dap yokelak. Bin bi gep okok, mani koñai nep dap yoklak. ⁴²Pen bin kañil mani ma midek alap, kab magil lakañ magil sikol omal dap yokak. ⁴³Niñ gek niñil, Jisas ne bi ne okok agek apelak agak, "Yad nibep niñid yib agebin, bin bi okok kiri mani sikol ñebal, pen bin kañil aul mani kib yib ñib. ⁴⁴Tari ginig: bin bi mani koñai mideb okok, mani kiri ognap sek koñai nep midek niñlig gi, mani kiri God nop ognap nep dap ñibal; pen bin kañil aul, mani ne magil omal midosip ak magilsek dap ñib. Ne tap tau ñiñeb mani alap ma mideb. Niñ gip ak, God niñek, bin bi ognap kiri tap sikol ñibal ak pen bin kañil aul ne tap kib yib ñib," agak.

God sobok gep karip wal ginigab, agak
(*Mat 24:1-2; Luk 21:5-6*)

13 ¹Jisas God sobok gep karip ak kirig gil söñ amek niñlig gi, bi ne alap nop agak, "Minim ag ñeb bi. Kab tep dil, karip tep gilak aul niñan!" agak. ²Agek, Jisas agak, "Nak kab karip kib nibak niñil ageban ar? Kisen karip nib aul pag jisipik masipik gi yokel, kab alap, kab alap ar siñak ma midenigab; pis nep pag yokniñab," agak.

Miker dil koslam midenigal, agak
(*Mat 24:3-14; Luk 21:7-19*)

³Jisas nib agil, God sobok gep karip ak kirig gil, Olip Dim amnak. God sobok gep karip ak tau kid adarj mideb, Olip Dim tau kid aul mideb. Jisas

Olip Dim sijak bisig midek niŋlig gi, Pita, Jon, Jems, Edru kiri yakam apil nop aglak, ⁴“Tap agesan ak, ñin akal rek ginigab? Pen tap tari rek gek niŋil agnigabin, ‘Tap nib okok miñi ginig geb,’ agnigabin?” aglak. ⁵Agelak, Jisas kirop agak, “Niŋ tep gil, minim esek agel ma dinimib! ⁶Bin bi koŋai nep apil, esek agil, yib yip ak dil, agnigal, ‘Yad Jisas nep apebin,’ agnigal. Nib agel, bin bi koŋai nep, niŋid agebal agil, kirop kisen ginigal. ⁷Karip lim siŋ aul pen pen gebal, karip lim okok pen pen gebal,’ agenimel, gos par ma niŋnimib. Tap nib okok ginigab ak pen miñi karip lim wagin aul tap okok magilsek kir ginigab, agil, gos ak ma niŋnimib. ⁸Bin bi migan ognap warikil, bin bi migan ognap eip pen pen ginigal. Kiŋ migan ognap warikil, kiŋ migan ognap eip pen pen ginigal. Karip lim okok magilsek monmon dil, yuan kib yib apil ginigab. Tap ginigab nib okok, bin okok kirop ned ñi pai ñibosip, kisen ñi pai tikpal rek ak ginigab. ⁹Pen nibi niŋ rep gilig gi midenimib. Ñin ognap nibep dam Juda kansol bi okok kirop ñel, minim kib agnigal. Ñin ognap, Juda mogim gep karip migan okok, yir dil, nibep paknigal. Ñin ognap, Jisas bi ne, agil, nibep dam gapman bi kib abe kiŋ abe midenigal sijak amil, minim kib agnigal. Pen nig dad amenimel ak, minim tep yad ak gapman bi kib okok abe, kiŋ okok abe kirop ag ñinigabim. ¹⁰Ned minim tep yad ak, bin bi karip lim ke tigoŋ tigoŋ magilsek ag ñel amnigab.

¹¹“Pen yad pis ken midenigabim ak niŋil, nibep minim kib agnig dad amenimel ak, minim pen titi gil agjin, agil, gos par ma niŋnimib. Agnig gem niŋlig gi, Kaun Siŋ nibep gos tep ñek, agnigabim. Minim nibak nibi ke ma agnigabim; Kaun Siŋ ne ke agnigab. ¹²Ñin nibak, mam bi okok warikil, mam ognap kirop ñag pak lilaŋ, agil, kain gi dam bi minim niŋep bi okok ñinmagil ar kirop ñel, ñag pak linigal. Nap bi okok warikil, ñi pai kiri ke okok kirop ñag pak lilaŋ, agil, kain gi dam bi minim niŋep bi okok ñinmagil ar kirop ñel, ñag pak linigal. Ñi pai okok warikil, nonim nap sikop kirop niŋel, milik yapek, kirop ñag pak lilaŋ, agil, kain gi dam bi minim niŋep bi okok ñinmagil ar kirop ñel, ñag pak linigal. ¹³Yad pis ken midenigabim ak niŋil, nibep milik kal niŋnigal ak pen, nibi bin bi an an, kilis gilig gi, yip ma kirig gil, cig gilig gi nep midenigabim okok, ñin kisen agebin ak apenigab ak, God nibep di komiŋ yoknigab,” agak.

Kisen tap timel yib miseŋ linigab, agak

(Mat 24:15-28; Luk 21:20-24)

¹⁴“Pen tap bil asik mosik gep ak, kau ne ma ameb sijak amil warikil midenigab, niŋnigabim ak, nibi bin bi karip lim Judia midenimib okok, kasek pirik gi dim gol okok amnimib. (Nibi bin bi minim aul miñi nep udiŋ li niŋebim okok, minim wagin ak tik niŋ tep ginimib.) ¹⁵Bin bi karip ar alaŋ midenimib okok, tap yad ognap dinim, agil, adik gi sijak eyaŋ

ma amnimib; karip miḡan eyaḡ ma amnimib. ¹⁶Bin bi wög dai okok ajenimib okok, walij par yad alap dinim, agil, adik gi karip ma amnimib. ¹⁷Pen ñin nibak, bin ñi pabag sek midenimel okok abe, bin ñi paiḡaḡ ci ñenimel okok abe, koslam yib pirik gi amnigal. ¹⁸Tap ginigab nibak, God nop sobok gil, karip yigen geb ñin ak ma ginimiḡ, agnimib. ¹⁹Tari ginig: God birarik ped okok karip lim gi lak ñin ak tikil, mid damil miñi midobin ñin aul, tap timel nibak rek alap ma gak; kisen okok ak rek nep tap timel nibak rek alap ma ginigab. ²⁰Tap timel nibak per gipkop, bin bi magilsek kim sakplap. Pen Bi Kib ne bin bi ne dinigab okok kirop gos niḡil, mer agek me, tap timel nibak yokop won alap ginigab.

²¹“Ñin nibak bin bi ognap nibep apil, ‘Niḡim! Krai middeb aul! Krai middeb adaḡ!’ agenimel ak, niḡid agebal agil, gos ma niḡnimib. ²²Bin bi ognap, God bin bi ne ke ag lak okok kirop din, agil, esek agil agnigal, ‘Yad me Krai; yad me bi God minim agep bi alap,’ agil, tap ma gep rek ognap ginigal. Pen God bin bi ne ke ag lak okok ma dinigal, mer. ²³Nib ak, niḡ tep ginimib. Tap tari tari kisen ginigab ak, yad nibep agen nipim ak me, niḡ tep gilḡ gi midenimib.

Jisas kisen adik gi onigab
(*Mat 24:29-31; Luk 21:25-28*)

²⁴“Pen miker kib nib okok gi sakek niḡlig gi, piḡ ak kislim gil, takin ak melik ma ginigab. ²⁵Gap okok seb kab ar alaḡ nib pig ju yap apek niḡlig gi, tap seb kab ar alaḡ middeb okok, okdaḡ nib okol nib ginigab. ²⁶Ñin nibak, Bi Ñi ne kilis ke yib dil, melik tep akniḡ ke sek kimi bad nab siḡak apek niḡlig gi, bin bi nop niḡnigal. ²⁷Pen ejol ne okok ag yokek karip lim ke yimñak yimñak magilsek tigoḡ tigoḡ okok amil, bin bi ne ke ag lak okok poḡ dil nop donigal.

Mab silip linigab
(*Mat 24:32-35; Luk 21:29-33*)

²⁸Jisas agak, “Niḡi mab tauan okok niḡnigabim ak, minim agebin aul niḡ tep ginigabim. Mab tauan okok silip lil, wös gek niḡlig gi, miñi piḡ linig geb, agil nipim. ²⁹Nib ak rek, kisen tap agebin okok gek niḡlig gi, ‘Miñi maḡ middeb, Jisas agak rek ginig geb,’ agil niḡnigabim. ³⁰Yad nibep niḡid yib agebin. Bin bi miñi midedal okok ognap midel niḡlig gi, tap nib okok gi sakek, kisen kimnigal. ³¹Seb kab ar alaḡ abe, lim dai wagiḡ aul abe kir ginigab; pen minim magil yad okok ma kir ginigab; per per nep midenigab.

Ñin akal onigain ak bi alap ma niḡip, agak
(*Mat 24:36-44; Luk 17:26-30,34-36*)

³²“Ñin akal aka magil akal onigain ak, bin bi ognap ma nipal, ejol okok ma nipal, yad Ñi ak, ak rek nep ma nipin; Bapi nep niḡip. ³³Nib

ak me, ñin akal onigain ak ma nipim rek, per per niņ tep yib gilig gi midenimib.

³⁴“Onigain ñin nibak, kesim agniņ gebin ar aul rek. Bi kib alap karip ne ak kirig gil miņan alap amniņ gi, bi wög gep ne okok kirop wög ar ke ke ag lil, ‘Wög niņ nig giņimib,’ agil, bi ne kijonj wagin kod midenigab ak nop agniņgab, ‘Niņ tep yib gil midenimin,’ agil, amniņgab. ³⁵Nibi ak rek nep, magil akal bi karip nap nib ak onigab ak ma nipim rek, niņ tep gil midenimib. Digep won ak onigab aka, kislim nab kib eyaņ onigab aka, kilokil gaul giņigab won ak onigab aka, kislim sek onigab, agil, ma nipim. ³⁶Nibi kinem niņlig gi, kasek onimiņ rek lip ak me, niņ tep gil midenimib. ³⁷Pen nibep nep ma agebin; bin bi okok magilsek ak rek nep agebin, niņ tep gil midenimib!” agak.

Jisas nop titi gil ñag pak lin, agil, gos ak niņlak

(*Mat 26:1-5; Luk 22:1-2; Jon 11:45-53*)

14 ¹Pen Juda kai Pasopa ñin kib ak abe, Bred Yis Sek Ma Niņeb ñin kib ak abe yokop ñin omal nep midek niņlig gi, bi God nop tap sobok gep bi kib okok abe, bi lo minim ag ñeb bi okok abe, Jisas nop titi gil, kapkap di cici lil, dam ñag pak lin, agil, niņ gil gos niņlak. ²Pen gos alap niņil aglak, “Pasopa ñin aul niņ gon, bin bi koņai nep siņ aul warikil, pen pen gil, cinop gi timel giņigal,” agil, kirig gilak.

³Jisas karip tiriņ tironj Betani amil, Saimon karip ak am bisig gil, tap ñibelak. Bi Saimon nibak, ned soi sapeb lak ak, Jisas gek, komiņ lak. Pen tap ñibel niņlig gi, bin alap wel ki tep owep mani kib taupal ak, barol sek dapil, nab siņak ti paņil, Jisas nop nabic ar alaņ soņ gak. ⁴⁻⁵Soņ gek, bi midelak nib okok, ognap niņel, cibur kirop aliksek lek, kiri ke aglak, “Wel nibak sikim gil, mi nokim alap bi alap wög gil mani dinigab rek ak dil me, bin bi tap ma mideb okok kirop ñeb ak pen tari giņig niņ gil yokop soņ gip?” aglak. Nib agil, bin nibak nop ag julak.

⁶Nib agelak, Jisas kirop agak, “Tari giņig nib agebim? Nop kirig gim! Yip gip nibak, gi rep yib gip. ⁷Bin bi tap ma mideb okok, nibep eip per nep midenigal rek, ñin ognap kirop tap ñiniņ, ñiniņgabim. Pen yad eip per ma midenigabin. ⁸Bin nibaul, tap ne gep rek ak, gip. Kimen, wel ki tep owep ak li ñil tigel giņigal rek, yip ned li ñib. ⁹Nib ak, yad nibep niņid agebin, kisen miniņ tep yad ak karip lim yimñak yimñak magilsek ag ñel amek niņlig gi, ne gip nibak sek agel, kiri bin nibaul nop gos saköl ma giņigal,” agak.

Judas, Jisas nop ñag pak lilaņ, agil, mimig gak

(*Mat 26:14-16; Luk 22:3-6*)

¹⁰Pen Jisas bi ne alap Judas Iskariot, Jisas nop mimig giņim agil, bi God nop tap sobok gep bi kib okok amnak. ¹¹Bi God nop tap sobok gep

bi kib nib okok, mimig gak nibak niñil, tep gek, aglak, “Nep mani ognap ñinigabin,” aglak. Agelak me, Judas, “Titi gil agen, kiri apil Jisas nop dad amnimel,” agil, gos ak piyo niñ midek.

Pasopa ñin ak miñi, agil, tap ñinlak
(*Mat 17:17-25; Luk 22:7-14,21-23; Jon 13:21-30*)

¹²Bred Yis Sek Ma Ñiñeb ñin kib ak apek, Pasopa kaj sipsip ñilik pak sobok gi ñiñeb ñin ak, Jisas bi ne okok nop ag niñil aglak, “Pasopa tap cin ñiñinigabin ak, migan akal gi jin gin?” aglak. ¹³Agelak, Jisas bi ne omal ag yokil agak, “Niri taun kib ak amil niñinigair, bi alap ñig mil dap padikenigab; nop nabiñ pakil eip amnimir. ¹⁴Bi nibak amil karip migan amonimiñ, niri mal bi karip nibak nap nib ak nop ag niñil agnimir, ‘Minim ag ñeb bi agip, “Bi yad okok eip Pasopa tap ñiñinigabin karip migan akal?” agip,’ agnimir. ¹⁵Niri ag niñer, ne nirep dam karip ar alañ, tap okok magilsek mideb ñilik migan kib ak yomnigab. Yomek, tap ñiñinigabin ak ñilik migan nibak gi jin genimir,” agak.

¹⁶Jisas kirop mal nib ag yokek, taun kib ak amil niñrek, Jisas agak rek nep midek. Niñil, Pasopa tap ñiñinig gilak ak, gi jin girek.

¹⁷Diğep won ak, Jisas bi ne akñib umigan alañ okok eip amjakil, ¹⁸bisig gil tap ñiblig gi agak, “Yad nibep niñid agebin, bi yad eip tap jim ñil ñibobin siñaul nep, bi alap, yip ñag pak lilañ, agil, yip mimig ginigab,” agak.

¹⁹Nib agek, bi ne okok yimig gek, gos miker niñlig gi, nop nokim nokim ag niñlig gi aglak, “Nak yip ageban aka?” aglak. ²⁰Agelak, Jisas agak, “Nibi bi yad akñib umigan alañ midebim okok, bi alap nig ginigab. Bi nibak me, yad eip tap kinañ nokim jim ñil ñibobir aul. ²¹Yad Bi Ñi ne, God Minim ñu kil tikil aglak rek nep kimnigain ak pen bi yip ñag pak lilañ, agil, mimig ginigab ak, nop yimig niñebin. Ne yur kib dinigab ak me, nop ma tik doplap ak tep,” agak.

Jisas bi ne okok kirop bred wain ñak
(*Mat 26:26-30; Luk 22:14-20; 1Ko 11:23-25*)

²²Tap ñiblig gi, Jisas bred ak dil, God nop tep, agil, ti pañil, bi ne okok kirop ñilig gi agak, “Di ñiñim! Ak miñ goñ yad,” agak.

²³Pen ñig wain kap ak, ak rek nep dil, God nop tep, agil, bi ne okok kirop ñek, magilsek ñibel niñlig gi, agak, ²⁴“Ñig aul, lakañ yad. Lakañ yad soñ gi yonigab ak me, God minim kilis niñid ag lak rek, bin bi koñai nep nop eip di jim ñinigab,” agak. ²⁵Nib agil agak, “Yad nibep niñid agebin, yad ñig wain kauyañ ma ñiñinigain. Yokop nep miden, God bin bi dil seb kab ar alañ siñak kod midenigab ñin ak nep, ñig wain kisen nib ñiñinigain,” agak. ²⁶Nib agil, bi ne okok eip God nop sobok gep kimep alap agil, Olip Dim amnilak.

Jisas Pita nop agak, “Yad Jisas nop ma nipin,’ agnigan,” agak
(*Mat 26:31-35; Luk 22:31-34; Jon 13:36-38*)

²⁷Jisas bi ne okok kirop agak, “God Minim ak ñu kil tikil aglak, ‘God ne agak, “Yad bi kaj sipsip mikep ak nop pak len, kaj sipsip okok pirik gi ke ke amnigal,” agak,’ aglak. Nib ak rek, midak midak nibi magilsek yip kirig gil, pirik gi amnigabim. ²⁸Pen yad kimil, warikil karip lim Galili amen, nibi kisen ninigabim,” agak. ²⁹Nib agek, Pita agak, “Bi ognap nep kirig ginimel rek lip ak pen yad nep ma kirig ginigain, mer,” agak. ³⁰Agek, Jisas agak, “Yad nep niñid agebin, miñi ñin aul nep, kislím nab eyañ kilokil sik omal ma agnigab won ak, ‘Yad Jisas nop ma nipin,’ agil, yij omal nokim we ñinigan,” agak.

³¹Agek, Pita minim kilis yib agil agak, “Yip nak eip ñag pak linig, ñag pak linimel ak pen yad Jisas nop ma nipin, agil, ma agnigain,” agak. Jisas bi ne okok magilsek, Pita agak rek nep aglak.

Jisas God nop sobok gi midek
(*Mat 26:36-46; Luk 22:39-46*)

³²Jisas bi ne okok eip mab wög dai Getsemani amil kirop agak, “Nibi siñaul bisig midem, yad am sobok ginig amebin,” agak. ³³Nib agil, Pita, Jems, Jon kirop poñ di damil, gos par lilig gi agak, ³⁴“Midmagil yad ak yur gi dap yowip ak, kimnim rek lip. Nibi wagin aul midil, niñ midenimib,” agak. ³⁵Nib agil, kirop siñak ag lil, ne yokop ulep nib siñak amil, lim dai eyañ yap pakil, yur kib dinig gek nibak, Nap ne mer agnimin aka mer ma agnimin, agil, sobok gilig gi midek. ³⁶Nap nop sobok gilig gi agak, “Bapi, nak tap okok magilsek gep ak nep mideb. Tap yip ginig geb ak, yad miker kib mideb. Nak yau agninin, yip aknib ma ginimin. Pen tap yip tari ginig genimin ak, gos yad niñnim ar ak ma ginimin, gos nak ke niñeban ar ak nep yip ginimin,” agak.

³⁷Jisas nib agil, adik gil bi ne omal nokim midelak siñak apil niñak, kiri pis nep wisin kin amnilak. Nib ak, ne Pita nop agak, “Saimon, ti ginig gil wisin kanaban? Yokop aua nokim alap nep niñ midenimin rek ma lip ar?” agak. ³⁸Nib agil, bi ne okok kirop agak, “Cin tap timel gijin rek lip, agil, niñ rep gil, God nop sobok gilig gi midenimib. Gos nibi ak ginimib rek lip ak pen mib goñ nibi yirik marik gip,” agak. ³⁹Nib agil, kauyañ adik gi amil, Nap nop ned sobok gak rek, kauyañ sobok gak. ⁴⁰Pen kauyañ adik gi apil niñak, bi ne okok pis nep wisin kal apek kin amnilak. Niñil, kirop agak, “Nibi wisin kinebim ar?” agak. Agek, nabiñ dil, pen agnimel rek ma lak.

⁴¹Pen Jisas kisen amil, adik gi apil kauyañ wisin kinelak ak niñil agak, “Nibi yokop kin midebim ar? Me tep! Ne bir owip. Nibi niñim! Bi alap apil, Bi Ñi ne kain gil, bi tap si tap timel gipal okok kirop ñinig geb.

⁴²Warikem amnin! Niñim! Bi yip kain gip apeb aul,” agak.

Jisas nop tig cici lilak

(Mat 26:47-56; Luk 22:47-53; Jon 18:3-12)

⁴³Jisas kirop minim nibak agek niŋlig gi, magil nibak nep, bi ne aknib umigan alaj bi alap, Judas, bi koŋai nep poŋ dil apjakak. Bi nib okok, bi God nop tap sobok gep bi kib okok abe, bi lo minim ag ñeb okok abe, bi minim tig bilokep okok abe, ag yokel olak. Kiri tu par kid ognap dil, yir pakep ognap dil, olak. ⁴⁴Judas ned kirop ag lil agak, “Yad bi alap nop amil ag wasu dil, tig bom silokil, milik ñibenigain ak, bi me elek, agil, nop tig cici lil, di wös gil dad amnimib,” agak.

⁴⁵Judas Jisas midek sɔŋak amjakil, “Minim ag ñeb bi,” agil, nop di bom silokek niŋlig gi, ⁴⁶bi ognap apil, Jisas nop tig cici lilak.

⁴⁷Jisas tig cici lel niŋlig gi, Jisas bi ne alap warikil, tu par kid ne ak di lip gi dil, bi God nop tap sobok gep bi kib yib ak wög nop gi ñoligip bi ak, nop timid pis kid ak pis nep tib ajaŋ ñag yokak.

⁴⁸Pen Jisas bi nop tig cici lilak okok kirop agak, “Nibi tu par kid dil, yir pakep dil, yip tap si pili gi dep bi alap, agil, azebim ar? ⁴⁹Yad per per God sobok gep karip ak amil, nibep eip midil, bin bi okok kirop minim ag ñoligipin ak pen yip tig cici ma lipek. Pen miñi kiri God Minim ak ñu kil tikil aglak rek nep gebim,” agak. ⁵⁰Pen won nibak nep, Jisas bi ne okok magilsek nop kirig gil pirik gi am saklak. ⁵¹Bi praj alap, walij parsek alap nep yimil, Jisas nop dad amelak ak kisen amek, nop abe tig cici lin, agel, ⁵²pirik amek, walij par nop ak tig ju del, ne magil nep pirik amnak.

Jisas nop minim kib aglak

(Mat 26:57-68; Luk 22:54-55,63-71; Jon 18:13-14,19-24)

⁵³Jisas nop dam, bi God nop tap sobok gep bi kib yib karip ak amnilak. Dad amelak, bi God nop tap sobok gep bi kib okok lil, bi minim tig bilokep okok lil, bi lo minim ag ñeb bi okok lil, apil karip nibak mogim gilak. ⁵⁴Pita pen lisim lisim niŋ damil, bi God nop tap sobok gep bi kib yib karip ne ak amjakil, bi karip nibak wög gelak okok eip bisig gil, mab maŋil midelak. ⁵⁵Bi God nop tap sobok gep bi kib okok abe, Juda Kansol kib bi okok magilsek abe, Jisas gi tagoligip minim wagin alap dil, nop ñag pak lin, ag piyo niŋ mer niŋlak. ⁵⁶Bin bi koŋai nep dapel, Jisas nop minim esek ar ognap aglak ak pen minim aglak ak adip adip ma aglak. Ke ke agel, minim wagin ognap ma niŋlak. ⁵⁷Pen ognap warikil, tom agil, aglak, ⁵⁸“Cin niŋ midon, ne agak, ‘God sobok gep karip, ñinmagil dil gilak aul, yad tib wal gi yokil, ñin omal nokim ak, kauyaŋ gi linigain. Kiri ñinmagil dil gipal rek ma ginigain; yad ke karip kisen nib ginigain,’ agak,” aglak. ⁵⁹Minim aglak nibak ak rek nep adip adip ma aglak; ke ke aglak.

⁶⁰Bi God nop tap sobok gep bi kib yib ak warikil, Jisas nop agak, “Minim nep agebal ak, nak minim pen alap ma ageban aŋ?” agak.

⁶¹Agek, Jisas minim alap pen ma agek, kauyaŋ ag niŋil agak, “Nak me Mesaia ak, Bi Kib tep ak Ñi ne ak akaŋ?” agak. ⁶²Agek, Jisas agak, “Yau me. Me yad nep. Yad, Bi Ñi ne, Bi Kib kilis ke yib ñinmagil yipid pis ar ne bisig mid kirig gil, seb kab ar alaŋ siŋak nib, kimi bad nab nab lil apenigain, niŋnigabim,” agak.

⁶³⁻⁶⁴Jisas nib agek, bi God nop tap sobok gep bi kib yib ak, walij ne okok ke tig bil bil gilig gi agak, “Ne God yib ne ak tib juosip ak bir nipim! Nib ak, bin bi ognap ma ag niŋjin. Ne gi timel gip ak miseŋ agip me ak. Nib ak, nibi tari gos niŋebim?” agak. Agek, bi kib okok magilsek warikil, aglak, “Bi nib gil ageb nibak, nop ñag pak lep,” aglak. ⁶⁵Nib agil, bi ognap Jisas nop kiŋik ñagil, walij bad alap di uŋin nop ak karik ñil, nop paklig gi aglak, “Nak ke niŋil, cinop agek niŋin, nep bi an pakeb?” aglak. God sobok gep karip bi polisman okok, ak rek nep nop tapin magil nep paklak.

Pita agak, “Yad Jisas nop ma nipin,” agak
(*Mat 26:69-75; Luk 22:56-62; Jon 18:15-18,25-27*)

⁶⁶Pita amil bisigak siŋak nep midek niŋlig gi, bin praj alap, bi God nop tap sobok gep bi kib yib ak nop wög gi ñoligip alap apjakil, ⁶⁷Pita mab tin kab midek siŋak niŋil, agak, “Nak ak rek nep Jisas bi Nasaret nib ak eip ajenak,” agak. ⁶⁸Agek, Pita agak, “Nak tari ageban? Minim ageban ak adi ma nipin,” agak. Nib agil, mis eyaŋ amek niŋlig gi, kilokil sik agak. ⁶⁹Bin praj nibak nep, Pita nop kauyaŋ niŋil, bin bi midelak okok kirop agak, “Bi aul bi ne alap,” agak. ⁷⁰Agek, Pita kauyaŋ mer agak.

Yokop magil alap midil, bin bi warik midelak nib okok, Pita nop kauyaŋ aglak, “Nak ak rek nep karip lim Galili nib ak me, cin nipin nak abe bi ne alap,” aglak. ⁷¹Agelak, Pita agak, “Bi Kib niŋ mideb; tom agen, yip ñag pak linigab. Pen niŋid yib agebin! Bi nib agebim ak yad ma nipin yib!” agak. ⁷²Nib agek niŋlig gi, kilokil ak kauyaŋ sik agak. Sik agek, Pita Jisas ned agak, “Kilokil sik omal ma agnigab won ak, ‘Yad Jisas nop ma nipin,’ agil, yij omal nokim we ñinigan,” agak minim ak niŋek, mapin gek, sil kib agak.

Jisas nop dam Pailot midek dad amnilak
(*Mat 27:1-2,11-14; Luk 23:1-5; Jon 18:28-38*)

15 ¹Kislim sek, bi God nop tap sobok gep bi kib okok lil, bi lo minim ag ñeb bi okok lil, bi minim tig bilokep okok lil, Juda Kansol bi kib okok magilsek lil, magilsek minim ag bim gil, Jisas nop nag lil, dam gapman bi kib Pailot midek siŋak dad amnilak. ²Dad amel, Pailot Jisas nop agak, “Nak Juda bin bi kiŋ kiri ak akaŋ?” agak. Agek, Jisas agak, “Me nak apan me ak,” agak.

³Bi God nop tap sobok gep bi kib okok Jisas minim kib agil minim ke ke konjai nep aglak. ⁴Nig gek, Pailot Jisas nop agak, “Nep minim konjai agebal ak, nak pen minim ognap ma ageban ar?” agak. ⁵Agek, Jisas pen minim ma agek, Pailot gos par yib nep ninjak.

Juda bin bi okok aglak, “Jisas nop mab bak alaŋ ñag pak lan!” aglak
(*Mat 27:15-26; Luk 23:13-25; Jon 18:39–19:16*)

⁶Pen Juda kai Pasopa ñin kib ak apek, per amil Rom gapman bi kib Pailot nop ag ninjel, kirop bi nagiman kiri ag ninjölöigipal bi ak nep yokop ag sönj yokolöigip. ⁷Pen minek nibak, bi alap yib ne Barabas bin bi ognap dil, Rom gapman eip pen pen gil, cip ñag pak lilak rek, kirop miñ lel midelak. ⁸Bin bi okok ap mogim gil, Pailot nop bi nagiman per ag ninjölöigipal rek ag ninjel, ⁹Pailot kirop agak, “Juda kiŋ kib nibi ak, nibep wisib yoknim aka?” agak. ¹⁰Tari ginig: Pailot ne ke ninjak, bi God nop tap sobok gep bi kib okok, Jisas nop yokop milik yapek, nop dap ñilak. ¹¹Pen bi God nop tap sobok gep bi kib okok, bin bi okok kirop aglak, “Pailot nop agem, Jisas mer, Barabas nop wisib yoknimiŋ,” aglak. Nig gel, bin bi okok Pailot nop aglak, “Barabas nop cinop wisib yokan,” aglak. ¹²Nib agelak, Pailot agak, “Nib apim ak, pen bi nibaul nibi Juda kiŋ cin apim ak, nop tari ginim?” agak. ¹³Agek, kiri minim bleble gil aglak, “Nop mab bak alaŋ ñag pak lan!” aglak. ¹⁴Agelak, Pailot agak, “Ne tari gi timel gek, nop nig ginim?” agak. Nib agek pen kiri bleble yib gil aglak, “Mab bak alaŋ ñag pak lan!” aglak.

¹⁵Pen Pailot, minim kilis aglak nibak dil, bin bi okok kirop tep gaŋ, agil, Barabas nop yokop ag yokil, bi ne ognap kirop agek, Jisas nop nag lil, tapin magil paklak. Jisas nop pak dai juel ninlig gi, Pailot agak, “Nop dam mab bak alaŋ ñag pak lim,” agak.

Ami bi okok Jisas nop ag julak
(*Mat 27:27-31; Jon 19:2-3*)

¹⁶Ami bi okok, Jisas nop dam gapna Pailot karip ne miŋan eyaŋ dad amil, bi yakam kiri magilsek kirop sik agel apelak, ¹⁷waliŋ lakañ parsek alap, gapman bi kib okok tol gi mideligipal rek Jisas nop tim ñil, tap ñu ñu sek ognap tik dapil, kiŋ tol gipal usaŋil bad rek alap gil, nop nabic alaŋ tol gi ñilak. ¹⁸Tol gi ñil, Jisas nop aleb aleb ñilig gi aglak, “Nak Juda kiŋ kib per nep midenimin!” aglak.

¹⁹Nib agil, yir dil, nabic nop pakil, nop kiñik ñag ñilak. Midek ulep siŋak kogim yimil, kiri kiŋ nop göligipal rek, nop kibor kiyan gilak. ²⁰Nop nig gil ag juil, waliŋ lakañ parsek nop tim ñilak ak tig ju yokil, waliŋ ne ke ak yim ñil, mab bak alaŋ ñag pak linig dad amnilak.

Jisas nop mab bak alaŋ ñag pak lilak
(*Mat 27:32-44; Luk 23:26-43; Jon 19:17-27*)

²¹Kiri nab siŋak amlig gi, Aleksada Rupas mamil mal nap kiri Saimon, Sairini taun nib bi ak, okok gi tagil, apil Jerusalem amnig amek ak,

nop nabiŋ pakil, kilis gil, aglak, “Jisas mab kros ak di ka gil dad non!” agel, dil kirop eip amnak. ²²Nig gil amil, Jisas nop damil karip lim siŋak minim yib yib Golgota agöligipal kau siŋak amjaklak. Golgota minim wagin ak “Çip Nabic Cög Tiŋil.” ²³Amjakil, kiri ñig wain alap dil, marasin mö apal ognap di piŋil adik madik gil, Jisas nop ñilak pen ma ñiŋak. ²⁴Jisas nop mab bak alaŋ ñag pak lil, walij nop okok dil, nonim li ke ke dinig, sadu rek gilig gi dilak.

²⁵Pib kislim sek lim gi yokil yokop siŋeped alaŋ owak won ak, Jisas nop mab bak alaŋ cipil pak lilak. ²⁶Cipil pak lil, tari ginig ñag pak lilak minim ak, mab kros bak ar alaŋ ñu kil tiklak:

JUDA KAI KIIŊ KIRI ME AUL.

²⁷Minek nibak, bi tap si dep omal ak rek nep ñag pak lilak, alap ñin yipid gil pis kid, alap ñin aŋidken pis kid. ²⁸Gilak nibak, God Minim ak ñu kil tikil, ginigal aglak rek nep gilak. Minim nibak ñu kil tikil aglak, “Nop niŋel, bi tap timel gep alap rek linigab,” aglak.

²⁹Bin bi okok ap ran ap yaplig gi, Jisas nop niŋil, nabic gor mar gil, nop ag julig gi aglak, “Nak, ‘God sobok gep karip ak tib wal gil, ñin omal nokim kauyaŋ gi linigain,’ agnak ak, ³⁰miñi nak ke gil, mab kros bak alaŋ kirig gil, lim wagin eyaŋ yapil komiŋ amnon,” aglak.

³¹Bi God nop tap sobok gep bi kib okok abe, bi lo minim ag ñeb bi okok abe, Jisas nop ak rek nep ag julig gi, kiri ke nep pen agek pen agek gil aglak, “Bin bi ognap kirop gek komiŋ amnilak ak pen miñi nod ke gek komiŋ amniŋ rek ma lip. ³²Ne per agip, ‘Isrel bin bi Mesaia midebin, Isrel Kiŋ midebin,’ agip rek, miñi nop mab kros bak siŋ alaŋ cipil pak lipal ak, ne ke ak rek nep warikil wagin eyaŋ yapil siŋaul apek, niŋil niŋid agip, agil, nop niŋ dinigabin,” aglak. Pen bi Jisas eip ñag pak lilak omal Jisas nop ak rek nep ag jurek.

Jisas kimak

(*Mat 27:45-56; Luk 23:44-49; Jon 19:28-30*)

³³Pib nab siŋepel owak won ak, kislim gil, mid damil, pib kim gak won ak kauyaŋ melik gak. ³⁴Melik gek niŋlig gi, Jisas meg miŋan dap ranil, sik agil agak, “Eloi, Eloi, lama sabaktani?” agak. Hibru minim agak nibak minim wagin ak, “God yad. God yad. Yip ti ginig kirig gipan?” ³⁵Agek, bin bi ulep nib siŋak midelak okok niŋil aglak, “Niŋim! Ne Ilaija nop sik ageb,” aglak.

³⁶Pen bi alap tap sain matres rek bad alap dil, ñig wain mani sikol taupal miŋan eyaŋ tauil, Jisas nop ñen ñiŋaŋ, agil, gamil par alap di kabis ñagil, midek ar alaŋ ñilig gi, agak, “Çin niŋ midon, Ilaija apil, nop tig asik dap lim wagin eyaŋ linigab aka?” agak.

³⁷Nib agil, niŋ midel niŋlig gi, Jisas sik kib agil, ake bad kir gak. ³⁸Won nibak nep, walij par kib God sobok gep karip magil ñilik miŋan

eyan kijon piliŋ gilak ak, nab siŋak pak bil bil gil, ke ke pis pis amil migan yik midek.

³⁹Bi ami okok kod midek bi kib ak, mab kros bak nab siŋaul ar siŋ alarŋ midek ak, Jisas nib agil kimak ak niŋil, agak, “Niŋid! Bi nibaul God Ñi ne yib!” agak.

⁴⁰⁻⁴¹Bin koŋai nep Jisas eip Jerusalem olak okok, apil gol siŋak midelak. Nab nibak, bin omal nokim Jisas nop kisen gil wög ognap gi ñöligipal karip lim Galili. Bin Maria omal miderek; bin yib alog nib omal, alap Magdala taun nib, alap Jems Josep mamil mal nonim kiri ak. Bin alap yib ne Salomi. Bin nib okok magilsek niŋ midel niŋlig gi, Jisas kimak.

Josep ne Jisas miŋ goŋ kab migan siŋak tigel gak

(*Mat 27:57-61; Luk 23:50-55; Jon 19:38-42*)

⁴²⁻⁴³Josep bi Arimatia taun nib, Juda Kansol kib bi gep alap, God bin bi dil kod mideniŋab ñin nibak kod midoligip. Bi nibak, tol God nop sobok gep ñin ak, miñi tap gi jin gep, agil, tap gi jin gek. Jisas kimak ak niŋil, karip maŋ dignig geb, agil, miñi cip se tig asik dam tigel ginim, agil, ma pirikak; Pailot midek ak amil, ag niŋak. ⁴⁴Ag niŋek, Pailot, Jisas bir kimak minim ak niŋil, pak ju dil, bi ami sikop kod midek bi kib ak nop sik agek, apek, ag niŋak. ⁴⁵Ag niŋek agak, “Midarik kimib,” agak. Nib agek, Pailot Josep nop agak, “Yau. Cip se dam tigel gan,” agak.

⁴⁶Agek, Josep walij tid kib alap tauil, amil cip se tig asik dap yapil, walij ak di magilsek kom kam gil, damil kab migan kisen nib nep jirik lilak kab migan ak tigel gak. Tigel gil, kab salai kib alap tig go ga gi damil, cip tigel kijon ak piliŋ gak.

⁴⁷Maria Magdala eip, Maria Josep nonim ak eip, niŋ midel niŋlig gi, cip tigel gilak.

Jisas warikak

(*Mat 28:1-8; Luk 24:1-12; Jon 20:1-10*)

16 ¹Juda God nop sobok gep ñin kiri ak ap padikek, Maria Magdala ak, Maria Jems nonim ak, bin Salomi ak, cip se ak wel li ñiŋin, agil, amil wel ki tep owep ognap tau dap lel kinak.

²Minek Sade kislim sek warikil, piŋ bir kisen nep lim gi yokek, cip tigel gilak siŋak amelak. ³Kanib nab siŋak amlig gi aglak, “Kab kib cip tigel kijon pak piliŋ gilak ak, bi an tig kilili gi gol okok yoknigab?” aglak. ⁴Nib agil, amjakil niŋlak, kab kib yib cip tigel kijon pak piliŋ gilak nibak, bir lilig gi amil gol siŋak midek. ⁵Niŋil, kiri migan nibak sikid amil niŋlak, bi praj walij tid parsek yimak alap, ñinmagil yipid pis ken bisig midek. Nop niŋil piriklak. ⁶Pirikelak, kirop agak, “Ma piriknimib. Yad nipin, nibi Jisas bi Nasaret nib, mab bak alarŋ ñag pak lilak ak nop

niņņig apebim. Pen niņim! Ne siņaul ma mideb. Ne midarik nep warikil amib. Nop tigel gil lilak kau aul ap niņim. ⁷Pen kasek amil, bi ne okok Pita eip agnimir, ‘Jisas ne ned amil Galili midenigab. Ne ke nibep ned agak rek, nibi amil nop niņņigabim nib okok,’ agnimir,” agak.

⁸Nib agek, bin okok jel gek, ñin tob jep jep dek, cip tigel sönj amil kirig gil, pig gi rikid ag amnilak. Piriklak niņil bin bi ognap kirop minim nibak ma ag ñilak.

Maria Magdala Jisas nop niņak

(Mat 28:9-10; Jon 20:11-18)

⁹Jisas kimil, ñin sabdaņ eyaņ ak warikil, ned yib amil, Maria Magdala midek siņak miseņ lek, nop niņak. Pen bin nibak nop ned kijeki kiyob ñilik akniņ ar oņid ak abaņ ñag midek niņil Jisas ag mis yokak. ¹⁰⁻¹¹Ne Jisas nop niņil, amil bi ne okok sil ag midelak nab siņak amil, Jisas komiņ mideb nop nipin, agek, kiri pis nep kimib, agil, minim nop ak ma niņ dilak.

Jisas bi ne omal kanib nab siņak amil nop niņrek

(Luk 24:13-15)

¹²Kisen pen, Jisas bi ne omal karip lim miņan alap gi ajerek, Jisas bi akniņ ke rek lil apil, kanib nab siņak miseņ lek, nop niņil, ¹³amil bi ne ognap kirop ag ñerek ak pen, niņid agebir, agil, minim kirop ma niņ dilak.

Minim tep yad ak bin bi okok kirop ag ñinimib, agak

(Mat 28:16-20; Luk 24:36-49; Jon 20:19-23; Apo 1:6-8)

¹⁴Kisen minek alap me, Jisas bi ne akniņ agip alaņ tap ñib midel niņlig gi, Jisas nab kiri siņak miseņ lek, nop uđin kiri ke niņel, kirop ag gil agak, “Yad wariken, bin bi ognap yip miseņ niņil, apil nibep ag ñel, tari ginig tom agebal, ma warikip, agil gos niņim?” agak.

¹⁵Nib agil, kirop agak, “Nibi minim tep yad ak damil karip lim tigoņ tigoņ magilsek amil, bin bi okok magilsek ag ñinimib. ¹⁶Bin bi an an, minim tep yad ak niņ dil, ñig pakniņal okok, komiņ amniņal. Pen bin bi an an, minim tep yad ak ma niņ diņiņal okok, God kirop minim kib agek yur diņiņal.

¹⁷“Bin bi minim yad niņil, ‘Niņid ageb,’ agil, niņ diņiņal okok, tap ma gep rek ognap ginigal. Kijeki kiyob ñilik tap okok bin bi kirop abaņ liņigab okok, yib yad ak agil, ag mis yokniņal. Minim yib kiri ke ak kirig gil, minim kisen nib ar alap ke agniņal. ¹⁸Toi gadkol bin bi suip okok di niņel, tap alap kirop gek ma kimniņal. Tap timel bin bi ñibil kimal okok ognap ñibel, tap alap gek ma kimniņal. Pen bin bi tap ginigab okok, kirop ñinmagil lel, komiņ liņigab,” agak.

God Jisas nop dil karip lim ne seb kab ar alaŋ siŋak dad amnak*(Luk 24:50-53; Apo 1:9-11)*

¹⁹Bi Kib Jisas minim nibak kirop ag mibil juek niŋlig gi, God nop dil, karip lim ne seb kab ar alaŋ siŋak dad amnak. Dad amek, God ñinmagil yipid piŋ ar nop ar bisigak.

²⁰Pen bi ne okok amil, Jisas minim tep ak karip lim yimñak yimñak magilsek ag ñel amek niŋlig gi, Bi Kib, minim tep yad niŋid nep linimiŋ, agil, kirop eip midil, kilis ñek, tap ma gep rek okok gilak.